

F $\frac{10333}{3}$



70.333.
3

F

7.9.12

№ 11 წიგნის მე- „კოსმოს“ მომხატვლობა № სტამბის
საბჭოთაო

180


მერი თუ კაცობრიობა?!

(ბ. Bâton-ის წიგნის გამო).

აკ. ჩ.—ლისა.

[Handwritten signature]

საუკეთესო მამულიშვიდის და მსოფლიო მოქალაქის
დავით სარაჭიშვილის ხსოვნას.



თფილისი
სტამბა „ნადეჟდა“ მიხაილოვის ქუჩა № 6.
1912 წ.



ერი თუ კაცობრიობა?!

(ბ. Bâton-ის წიგნის გამო).

აკ. ჩ.—ლიხა.

F 10.333
3

საუკეთესო მამულიშვილის და მსოფლიო მოქალაქის
დავით სარაჭიშვილის ხსენებას.



თფილისი
სტამბა „ნადეჟდა“ შიხილიაფის ქუჩა № 5.
1912 წ.

წინასიტყვაობის მაგიერი.

უფ! — ასე წამოიძახებს ყველა ის, ვისაც მოთმინება ეყოფა და ბოლომდე გადაიკითხავს ბ. Bâton-ის თხზულებას: „ერი და კაცობრიობა, განხილულნი სოციოლოგიური მხრით.“ ეს სათაური გვამცნევს კიდევ, რომ საქმე თითქო წმინდა და სასტიკ მეცნიერულ გამოკვლევასთან გვაქვს, მაგრამ ეს უფრო პირველ შეხედვით. ამაში არ აგვიხირდება, იმედია, თვით ავტორიც, რომელიც არა ერთხელ ნათლავს თავის შრომას „პატარა მოთხრობის“ სახელით (გვ. 92 და სხვაგან). მკითხველი, უეჭველათ, ვერც ამაში დაეთანხმება ავტორს — „მოთხრობა“ ერთობ გაქიანურებულია და მოსაწყენი, — მაგრამ არც აქაა სადაო რამე, რაიცა სჩანს წიგნის წინასიტყვაობიდან: „ვგრძნობ აგრეთვე — გულახდილათ გვიცხადებს ავტორი, — რომ თვით ფორმა მოთხრობისა ვერ არის სასურველი, — შესაძლებელი იყო უკეთესი და უმარტივესი ფორმა ამერჩია. ენაც ქართული ვერა მაქვს სასიამოვნოდ სასმენელი. ხშირი განმეორებითაც თავს ვაწყენ მკითხველს. მაგრამ პირველი ორი ნაკლის თავიდან აცილება ჩემს ძალას აღემატებოდა, მესამე კი განზრახ ჩავიღინე, რომ უფრო ნათელ-მეყო ჩემი აზრი“ (XXXII). ჩემგან ხაზ-გასმული „განზრახ“ შეიძლება მართლაც სანაქებოა ავტორის თვალში, მაგრამ ვეჭვობ, იგი ასეთი დარჩეს მკითხველის თვალშიც: ერთისა და იმავეს გლახა კრიაშვილის ჰანგზე და-უბოლოვლათ განმეორება „ვერ არის სასურველი და ვერც ნათელ-საყოფელი“. ხოლო სულ ტყუილა ცდილა ავტო-



რი კიდევ უფრო დაემძიმებინა მისი „დანაშაულები“ და დაემატა „წინასწარი განზრახვით“, რადგან, რამდენათაც მის ნაწერებს ვიცნობ, ხშირი და გაუთავებელი განმეორება მის ისეთ ორგანიულ თვისებას შეადგენს, რომლის „თავიდან აცილება“ ქეშმარიტად „აღემატება მის ძალას“!

წიგნის მოვლინებას უფრო ღრმა და გულწრფელი მიზეზ-საბაბი უძევს სარჩულად. „ჩემთვის ეროვნული საკითხი—ვკიოხულობთ იმავე წინასიტყვაობაში—გადაწყვეტილი არ არის, ეს საკითხი კი ჩემი ყოფნა არ ყოფნის საკითხია..... და ამიტომაც მინდა აღვიარო სამართლიანი და კანონიერი უფლება ჩემი არსებობისა, განვამტკიცო იგი ჩემს რწმენაში და ვეცადო საზოგადოდ დავამტკიცო, როგორც შემძლია, იმავე უფლების სამართლიანობა ყველა ჩაგრულ ერისთვის“ (XXXI, ხაზი ჩემია). როგორც ხედავთ, ავტორი იურისტთა თქმის არ იყოს „დაინტერესებული მხარეა“, მას არ ძალუძს გულდგრილათ და მიუდგომლათ იმსჯელოს. თავის თხზულებასაც ალბათ ამიტომ დარქვა მან მოთხრობა, რადგან მასში გატარებული დედა-აზრი ავტორისათვის „ყოფნა არ ყოფნის საკითხია“. ნურვინ დამწამებს ვითომ მე აბუჩად ვიგდებდე ავტორის ეროვნულ გრძნობას და გულწრფელობას—დიდება და პატივი ორივეს—, მე მაწუხებს მხოლოდ ის, რომ ავტორმა ნაცვლად მეცნიერულ ფორმისა რომელიმე მხატვრული ფორმა არ აირჩია თავის ტრადიკულ სულის-კვეთების მკითხველის წინაშე გადმოსასლელათ.

მაშინ არც მე გამიძნელებოდა მკაფიოთ გამერჩია მის შრომაში გონების ნაყოფი გრძნობის ნაყოფისაგან. ავტორი ღელავს და შფოთავს მთელ 375 გვერდის სიგრძეზე, მას მოსვენებას არ აძლევს ვილაცა, პრაზსა ჰგვრის რაღაცა.... ალაგ-ალაგ იგი თითქო კიდევ ებრ-



ძვის ამ, მის მკერდში დაგუბებულ, გრძობებს, მაგრამ
 ამაოთ. მისი კილო ძვირათ თუა ღინჯი და დარბაისლუ-
 რი, როგორც ეს შეფერის თვით მისგან აღებულ თემას;
 იგი, კილო, უმეტესათ დრამატიულია, ხან პათეტიური
 და ზოგ შემთხვევაში, სამწუხაროთ, ისტერიულიც. რო-
 გორ გნებავთ ანგარიში გაუწიოთ ასეთ შრომას? წიგნი
 უეჭველათ მდიდარ მასალას იძლევა ჩვენი დროის დამა-
 ხასიათებელ ერთ-ერთ ტიპიურ პიროვნების ღრმა ფსი-
 ხოლოგიურ ანალიზისათვის, მაგრამ ეს როდია ამ წიგნა-
 კის საგანი.

მაშ ასე, ერი და მისი სვე-ბედი მოსვენებას არ აღ-
 ლევს ჩვენს ავტორს და კიდევ ამიტომ მის შრომას ყო-
 ველ ნაბიჯზედ სულ-წასულობის დალი ასვია. ბ. Rätton
 წიგნის დასაწყისშივე ამბობს თუ რა პრობლემა დაუსა-
 ხავს მას გადასაკრელათ და რა მიზნით, აი ეს სიტყვე-
 ბიც: „**რა არის კაცობრიობა და რა არის ერი სოცია-**
ალური მხრით, საზოგადოებრივი სინამდვილის
მხრით? შეეწირება თუ არა პირველს მეორე?“ (2, ხაზი
 ავტორისაა). ამ გვარათ, განსაზღვრელათ დასახულია ერ-
 თის მხრით კაცობრიობა, ხოლო მეორეს მხრით ერი,
 და ეს კი მხოლოდ და მარტო იმ მიზნით, რომ ერთი
 მათგანი უთუოთ **ზვარაკად** უნდა „შეეწიროს“ მეორეს!

ავტორი, როგორც ხედავთ, მთლად შეპყრობილია
წინასწარი აზრით, რომლის გარეშე ის ვერც ამჩნევს
 რამეს და არც უნდა რამე შეამჩნიოს. თუ ის, მაგალი-
 თად, ძალზე აძაგებს აქა-იქ და პირიდანაც დორბლებსა
 ყრის დოგმატიზმის, ან კიდევ დოქტრინარიზმის ყოველ
 ხსენებაზე, ეს სულაც არ ნიშნავს იმას, რომ თვითონ ის
 თავისუფალია ან ერთისა და ან მეორისაგან. პირიქით, ეს
 ორი თვისება იმდენათ თანდაყოლილია და თანშეზრდი-
 ლი მის არსებაში, რომ ის ხშირად გვაგონებს გაათურე-

ბულ ინდოელ ფანატიკოსს, რომელიც მზათაა წაჭვლიჯოს ყველა იმით, ვინც მის აზრსა და არ იზიარებს.

ასეთ ყაიდის ადამიანმა აბა როგორ უნდა შესძლოს რომელიმე მეცნიერულ პრობლემის საფუძვლიანათ დამუშავება და გადაჭრა? თანახმათ თქმულისა ბ. Bâton-ის ნაწარმოებში არ წარმოადგენს თვით ავტორის მიერ ღრმად მოფიქრებულ, ფრთხილათ აწონილ-დაწონილ, ორიგინალურ და მთლიან მეცნიერულ გამოკვლევას. იგი არის, ასე ვსთქვათ, ერთი ვეება კალეიდოსკოპი მრავლისაგან მრავალ აზრებისა და დებულებათა, რომელნიც ამოუკრეფია ავტორს აუარებელ უცხოელ მოაზრეთა წიგნებიდან, და ეს არა იმდენათ ამა თუ იმ კემშირიტების „ნათელ-საყოფელათ“, რამდენათ მისგან აკვიატებულ წინასწარ მიზნის—ზვარაკად შეწირვა!—მისაღწევათ. გამოდის ისე, თითქო ავტორს არც კი სცხელა მისგან ნასესხ აზრთა და დებულებათა ურთიერთ შორის ლოდიკურ შეკავშირებისათვის; იგი მეტის-მეტათ ჩქარობს და არ აკვირდება, სად და რა შემთხვევაში გამოუთქვამს ამა თუ იმ უცხოელს ესა თუ ის აზრი ან დებულება; პირიქით, შთაბეჭდილება ისეთია, თითქო ავტორს თავდაპირველათ უბრალო დიაკვნურათ გადაეკითხოს ყველა მისგან დასახელებულ მეცნიერთა ნაწარმოებნი და იქიდან მექანიკურათ ამოეკრიფოს მხოლოდ და მარტო ისეთი აზრები და დებულებანი, რომელნიც ასე თუ ისე ამოწმებენ, ან უკეთ, —ადასტურებენ მის მიერ თავიდანვე მზამზარეულათ აღებულ და აქედან ერთობ შეყვარებულ დედა-აზრს. მეთოდი, თავის თავათ ცხადია, არაა თანამედროვე, იგი სხოლასტიკურია და უვარგისი.

ამით მე სულაც არ მინდა დავმალო ის უტყუარი ფაქტი, რომ ბ. Bâton, მიუხედავათ მის დაუდგრომელ

სამხრეთელ ტემპერამენტისა და ჰიპერბოლურ აზრთა
 ბისა, დიახაც ნიჭიერი პუბლიცისტია, რომლის ნაწერე-
 ბი უფრო გულის სიღრმიდან აღმონახეთქ იმპროვიზა-
 ციას წააგავს, ვინემ ცივ და დიალექტიურ გონების ნა-
 ყოფს. მის ბუნებას არ ეგუება დამჯდარი მეცნიერული
 კვლევა-ძიება. რამდენათ უკეთესი იქნებოდა ეს თხზუ-
 ლება ისე დაეწერა მას, როგორც „უფალმა ჩაუდგა თავ-
 ში“! ხოლო რაც შეეხება იმ მართლაც მდიდარ მასალას,
 რომელიც მას ხელთ ქონია, შესაძლებელი იყო მოეხმა-
 რა თუ გინდ ამ გვარათ: შეედგინა სრული მონოგრაფია
 უცხო ლიტერატურისა **ერზე** და მასთან მჭიდროთ და-
 კავშირებულ კითხვებზედ. ამით ის გაცილებით უფრო
 დიდ სამსახურს გაუწევდა ქართველ მკითხველს, რომე-
 ლიც ასე დაინტერესებულია ამ უკანასკნელათ ხსენებულ
 პრობლემის შესწავლაში. მაგრამ რაღა ამაზე უნდა შეე-
 ჩერდეი, როცა ბ. Bâton-ს ისიც კი არ დაუნახავს საჭი-
 როთ მიეთითებია მკითხველისათვის, სახელდობრ რომ-
 მელ გვერდზე გამოუთქვამს თვითეულ მისგან ნახსენებ
 მეცნიერს ესა თუ ის აზრი. მართალია, არის გამოჩა-
 ლისი ამ მხრივ, მაგრამ ეს ხომ მარტოდენ საერთო
 წესს ამტკიცებს.



მ რ ი.



არც ისე დიდი ხანაა მას აქეთ, რაც ცნება ერი ანუ ნაცია საზოგადოებრივ მეცნიერების საკვლევ საგნად იქცა. მხოლოდ მე-XIX-ე საუკუნის მეცნიერნი აქცევენ მას განსაკუთრებულ ყურადღებას და დღეს უკვე ვრცელი ლიტერატურა არსებობს მის შესახებ სხვა და სხვა ენაზე. ეს არაა გასაკვირი, რადგან ერთა ჩამოყალიბების პროცესს და აქედან ეროვნულ ბრძოლას ფრიად თვალსაჩინო ალაგი ეჭირა ევროპაში გასულ საუკუნეში. არც ჩვენი დრო წარმოადგენს ამ მხრივ რაიმე გამონაკლისს, რადგან დღესაც წარმოებს ეგ ჩამოყალიბების პროცესი, აგრეთვე დღესაც არსებობენ როგორც „მპყრობელნი“ (державные нации) ისე დამონაგებულნი ერნი, აქედან ეროვნული შუღლი და აურ-ზაური კვლავინდებურათ სწამლავს ჰაერს და აუკულმართებს ადამიანთა ურთიერთობას.

ეჭვს გარეშეა, თავისუფალ ერის მოაზრეს ხსენებულ პრობლემის უფრო თეორიული მხარე აინტერესებს, ხოლო ჩაგრულ ერისას კი პრაქტიკული. ბ. Bâton, ჩაგრულ ერის მოაზრე, ორსავე მხარეს ერთბაშით არკვევს თავის წიგნში. მე ვთქვი „არკვევს“, თუმცა ეს გამორკვევა, ერთის მხრით, უცხოელ მეცნიერთა აზრების ერთი მეორეზე დაკოწიწებაში გამოიხატება, ხოლო მეორეს მხრით ადგილობრ იდეურ მოპირდმპირეთა ლანდღვა-თრევაში. პირველ შემთხვევაში ის თეორეტიკოსობს, ხოლო მეორეში პოლიტიკოსობს, მეც ამიტომ ჯერ დავიწყებ თეორიიდან და შემდეგ გადავალ პოლიტიკაზე.

თავის თავათ მისახვედრია, ბ. Bâton, ცდილობს განსაზღვროს ცნება ერი, და თავის მსჯელობას ამ საგან-

ზე ის ამყარებს ერთ-ერთ ზოგად კრიტერიუმზედ; კრიტერიუმად მას მიუჩნევია **სოციალობა**, ე. ი. ადამიანთა შეერთებულ ბაერთათ სამოქმედოთ, საერთო მოთხოვნილებათა დასაკმაყოფილებლათ. ასეთ შეერთებას ჩვენ ვეძახით საზოგადოებას, და აი ჩვენი ავტორიც წიგნის პირველ და ყველაზე უვრცელეს თავში გვიხსნის, რა არის საზოგადოება.

ავტორი საკიროთ არ თვლის ანგარიში გაეწიოს საზოგადოების განვითარების სხვა და სხვა საფეხურებს, ან სხვა სიტყვით — ის იღებს განუყენებულ საზოგადოებას, **დამოუკიდებლად დრო და ადგილისა**. ასეთ საზოგადოებას, მისი აზრით, ახასიათებს, ერთის მხრით, „გარეგნული მოწესრიგება“, მეორეს მხრით, შინაარსი ანუ ჯამი „სოციალურ მოვლენათა“. იგი ხელმძღვანელობს **დეგრეფის** ცნობილ კლასიფიკაციით და მოჰყავს შემდეგი სოციალური მოვლენანი: „1) მოვლენანი კვებისა და მზგავსი ეკონომიური მოვლენანი. 2) მოვლენანი გენეზიური-შთამომავლობის გაჩენის და აღზრდის მოვლენანი. 3) მოვლენანი არტისტიულნი — ხელოვნების მოვლენანი. 4) მოვლენანი რელიგიური და მეცნიერულნი — სარწმუნოებისა და ცოდნის მოვლენანი. 5) მოვლენანი ზნე-ჩვეულებისა და ზნეობისა — მორალური მოვლენანი. 6) მოვლენანი იურიდიულნი — მოვლენანი სამართლის განწყობილებათა. 7) მოვლენანი პოლიტიკური.“ (10—11). მათ გარდა არის კიდევ ერთი „უმშვენერესი და განსაცვიფრებელი“ სოციალური მოვლენა — **ენა** (36) აი, ეს სოციალური მოვლენანი და გარეგნული მოწესრიგება ჰქმნიან ადამიანთაგან იმას, რასაც ჩვენ საზოგადოებას ვეძახით. მაშასადამე, დაასკვნის ავტორი „საზოგადოება არის ორგანიზმი, ანუ სუპერ ორგანიზმი შემდგარი მიზანს დასახვის ნიჭის მქონე ადამიანთა-



გან, რომელთა გარეგნულათ მოწესრიგებული საერთო მოქმედება აკმაყოფილებს ამ ორგანიზმის ყველა მოთხოვნილებას იმ სპეციალურ ორგანოთა საშვებლებით, რომელნიც აქვს ყოველ სუპერ-ორგანიზმს განსაზღვრულ ფუნქციითა აღსასრულებლად (53—4, ხაზი ავტორისა).

აი კრიტერიუმი ანუ საზომი, რომლის დახმარებით ლამობს ავტორი როგორც ერის, ისე კაცობრიობის გათვალისწინება—განსაზღვრას. ის მსჯელობს ასე: ერი და კაცობრიობა თავის თავათ, ზოგადათ აღებულნი, გამოურკვეველი რამ ცნებანი არიან, ამიტომ, საჭიროა მათი განჭვრეტა „სოციალური ანუ საზოგადოებრივი სინამდვილის მხრით“, — ეს კი მოასწავებს იმას, რომ ერის თუ კაცობრიობის რეალობა დამოკიდებულია იმაზე, არის თუ არა თვითეული მათგანი „გარეგნულათ მოწესრიგებული“ და თანაც მატარებელი ჩამოთვლილ „სოციალურ მოვლენათა“. ცნება ერი შეიცავს, ავტორის აზრით, ყველა ამ საზოგადოებრივ თვისებებს, ხოლო ცნება კაცობრიობა არა, — ამიტომ „ერი არსებობს სოციალურად, კაცობრიობა კი არ არსებობს“. (55, ხაზ. ავტ.)

გამოდის რა ამ თვალსაზრისიდან, ავტორი ასე განსაზღვრავს საბოლოოთ ცნება ერს: „ერი არის სოციალური სუპერ-ორგანიზმი ანუ ჰიპერ-ორგანიზმი (ტარდის სიტყვებით), შემდგარი ერთგვარი ანუ მრავალგვარ ეთნიურ და სოციალურ მასალისაგან, რომელსაც შეუძლია ჟამთა ვითარებაში შექმნას ერთი გარეგნულათ მოწესრიგებული საერთო ცხოვრება თავის შემადგენელ ერთეულთა, ერთი საზოგადოება ყველა თავის ორგანოებითა: ენითა, სარწმუნოებითა, მეცნიერებითა, ზნეობითა, ხელოვნებითა, სა-

მართლითა და პოლიტიკითა,—საზოგადოება განსაკუთრებული ისტორიითა, ტიპითა და თვითშეგნებითა, სრულის ინვიდუალობითა“. (130 — 1, ხაზ. ავტ.)

ყველაზე წინ მკითხველის ყურადღებას იპყრობს ორივე ცნების, ე. ი. საზოგადოებისა და ერის განსაზღვრის ერთ-იგივობა. მართალია, თვითეული ზევით მოყვანილი განსაზღვრა სხვა და სხვა სიტყვებს და ფრაზებს შეიცავს, აქედან ისინი თითქო დიდათ განირჩევიან ერთი მეორისაგან, მაგრამ ყველა ეს მხოლოდ გარეგნულათ. ახლო რო დააკვირდეთ, უქვევლათ გაგახსენდებათ ის, რაც მაზე აღრე ითქვა ავტორის მიერ სახელმძღვანელო კრიტერიუმის შემუშავების დროს. მართლაც და, ერიც და საზოგადოებაც ორივე სუბერ-ორგანიზმია, გარეგნულათ მოწესრიგებული, ორთავეში მიზან-დასახვის ნიქის მქონე ადამიანები მოქმედებენ და სოციალობა გამოწვეულია საერთო მოთხოვნილებათა საერთო ძალღონით დაკმაყოფილების საქიროებისაგან, ამიტომ ორთავეში თანაბრათ ვამჩნევთ ეგ. წოდ. სოციალურ მოვლენათ: გამოკვება-გამრავლებისას, ხელოვნებისას, სარწმუნოებისას, მეცნიერებისას და სხ.,—ამ გვარათ, ორთავეში ვხედებით სპეციალურ ორგანოებსა და მათ ფუნქციებს; აგრეთვე ყოველ საზოგადოებას აქვს არა ნაკლებ ერისა თავის ტიპი, ისტორია, თვითშეგნება, ინდივიდუალობა, რასაკვირველია, ამა თუ იმ ხარისხისა და ღირსებისა...

მაშასადამე, თითქო მივდივართ იმ დასკვნამდე, რომ საზოგადოებასა და ერს შორის არ უნდა იყოს არავითარი განსხვავება, გარდა სახელწოდებისა. მაგრამ ავტორი დიახაც არ გვეთანხმება ამაში, იგი განასხვავებს მათ ერთმანეთისაგან და ამას შემდეგ-ნაირათ განგვიმარტავს: „საზოგადოება აბსტრაქტიული ცნებაა განსაზღვრულ

ბუნების მოვლენისა, **ერი კი განსაზღვრული, კონკრეტული მაგალითია ამ მოვლენის არსებობისა ბუნების წიაღსა შინა.**“ (91, ხაზ. ავტ.).

იბადება კითხვა, რამდენათ მართალია ავტორის ეს უკანასკნელი დებულება? ჩემის აზრით, **ერი ისეთივე აბსტრაქტიული ცნებაა, როგორც საზოგადოება და ამიტომ არც ამ მხრივ არის მათ შორის რაიმე განსხვავება.** მართლაც-და, კონკრეტულად არსებობს, მაგ. გერმანელთა **ერი**, ფრანგთა **ერი** და სხვა და არა **ერი**, **თავის თავათ და საზოგადოთ აღებული.** იგივეიტქმის საზოგადოებაზედაც, მაგ. ბერძენთა ანტიური საზოგადოება, ქართველთა გვაროვნული საზოგადოება და სხვა, — ამ შემთხვევაში ცნების განყენების ადგილზე ჩვენ ვღებულობთ მის რეალურათ განსახვას. მაშასადამე, საქმედამოკიდებულია იმაზე, რომელ წერტილიდან ვუქვრვტთ ჩვენ საგანს.

მაგრამ ნუ ავხირდებით, — რეალობის სფერის განყენება გარდუვალია არამც თუ მეცნიერულ მსჯელობაში, არამედ უბრალო გასართობ ბაასშიც-კი. აღსანიშნავია მხოლოდ ის, რომ ავტორს ერთობ სჩვევია, გერმანელთა თქმის არ იყოს, აბსტრაქციებით „ჯირითი“, ის ივიწყებს, რომ მათ, აბსტრაქციებს, პირობითი ანუ სათუო მნიშვნელობა აქვთ მეცნიერულ მსჯელობაში. ვთქვათ, ავტორი მართალია: საზოგადოება აბსტრაქტიული ცნებაა, ხოლო **ერი კონკრეტული**, — მაგრამ რა მტკიცდება ამით პირველ ყოვლისა? ისა, რომ ავტორი აფუძნებს მთელს თავის გამოკვლევას აბსტრაქციაზედ: **რეალური ერი მას გამოაყავს განყენებულ საზოგადოებიდან, როგორც ეს ზევით დავინახეთ.** ასეთი მეთოდის იმის გარდა, რომ მოძველებულია, ხელს უწყობს მშრალ რეზონანსობას.

ავტორი სამართლიანათ შენიშნავს ერთ ალღვას, რომ ყოველი ერთ არის იმავე დროსვე საზოგადოება, მაგრამ ყოველი საზოგადოება სულაც არაა ერთი. აქედან ნათლათ გამოსკვივის ის ქეშმარიტი აზრი, რომ როგორც ერთი, ისე საზოგადოება ისტორიული კათეგორიები არიან. ეს რომ ასეა, ამას კარგათ ვამჩნევთ ავტორის მიერ ერის განსაზღვრაში, სადაც ხმარებულია ფრაზა „**ეამთა ვითარებაში**“. განა ამის შემდეგ მოსალოდნელი არ იყო, რომ სწორეთ ისტორიულის მხრით განიხილავდა ავტორი ორსავე ცნებას? ოღონდაც. მაგრამ ის განზრახ გაურბის ამ მადლიან საქმეს და მხოლოდ-ღა მეტაფიზიკურ ქურუმობას ეწევა. ხოლო, მეტაფიზიკაც არის და მეტაფიზიკიც. უფრო სერიოზული მათგანი წარა-მარა როდი გაისვრის განყენებულ აზრებს, ის უქვემდებარებს მათ ამა თუ იმ მტკიცეთ განსაზღვრულ ლოდიკურ მეთოდს და ამიტომ მის იდეალისტურ მსჯელობაში მკითხველი ნათლათ ამჩნევს აზრთა უთიერთ კავშირს, ერთიდან მეორეზე გადასვლას და სხ. ჩვენს ავტორს ქეშმარიტათ ვერ დავსწამებთ ასეთ „**ცოდვას**“. ისტორიულ-ევოლიუციონური განხილვა საზოგადოებისა და ერისა უქვევლათ მოითხოვდა ამა თუ იმ მეცნიერულ მეთოდის მომარჯვებას, ეს კი არც ისე ადვილი საქმეა, შეიძლება სახიფათოც გამზდარიყო ავტორისათვის!

სწორეთ ამ სათაგიდან გამომდინარეობს ის მთავარი ნაკლუანება, რომელიც ზევით აღვნიშნე. საზოგადოება და ერთი, ასე ვთქვათ, **ტყულება** მკითხველის თვალში, იგი ვერ გაართმევს მათ ვერც თავსა და ვერც ბოლოს. ავტორის მიერ დასახელებული ნიშანი — ერთის განყენება და მეორის განსახვა — არაა, როგორც ვთქვი, მოსატანი, და თუ გინდ მოსატანიც იყოს იგი, ამით დიდი არაფერი მტკიცდება. ტყუილა ფიქრობს მკითხველი, რომ ავ-



ტორი დაასაბუთებს მის მიერ წამოყენებულ, ფრიად მნიშვნელოვან დებულებას, რომ **ყოველი საზოგადოება არ არის ერი**. არაერთი ანალიზი ამის შესახებ წიგნში არ მოიპოვება.

და რადგან სიტყვამ მოიტანა, მეტი არ იქნება აქვე ვთქვათ გაკვირით, რომ საზოგადოება **გვარობითი (родовой)** ცნებაა, ხოლო ერი **სახეობითი (видовой)**; მასთან საზოგადოება მხოლოდ იმდენათ გულისხმობს ერს, რამდენათ პირველისაგან „ემათა ვითარებაში“ წარმოშობილა მეორე. ფორმალურ-ლოგიკურათ ასე შეიძლება ამ აზრის განმარტვა: **ადამიანთა სოციალობის ანუ საზოგადოებრივობის განვითარება - გართულების ერთი რომელიმე ხარისხი იწვევს იმას, რასაც ჩვენ ვეძახით ერს**. ამიტომია საკირო უწინარეს ყოველისა გულდასმით შესწავლული იქნას ცოცხალ ისტორიულ მაგალითების შემწეობით ადამიანთა სოციალობის განვითარება-გართულების ძლევამოსილი მსვლელობა და ამ პროცესიდან თანდათან გამოყოფილ იქნან, ან უფრო სისწორით რომ ვთქვათ—განყენებულ იქნან ის **ელემენტნი**, რომელთა ერთათ შეკონვა ბოლოს და ბოლოს იძლევა სურნელოვან თაიგულს—**ერს**. აი, რა გზით უნდა ევლო ავტორს, თუ მას მართლა საგნის მეცნიერულათ გამოკვლევა სწავდა. საზღვარი, სად უნდა იქცეს საზოგადოება ერთად და შერჩევა იმ უცილობელ ელემენტთა, რომელნიც ჰქმნიან ერს, სავსებით დამოკიდებულია თვით მკვლევარის თვალსაზრისზე, — ეს კი მოასწავებს იმას, რომ ყველა ამებისთვის მკვლევარს ექვივრება რაიმე კრიტერიუმი, გამომდინარე თვით მის ძირითად პრინციპებიდან. აი, საშვალეა, რომელიც გაუკაფავდა ავტორს ხსენებულ ეკლიან გზას.

ავტორი, მაგ., სამართლიანათ განარჩევს ერს ხალ-

ხისაგან, თუმცა უკანასკნელი უფშველათ საზოგადოებრიობის განვითარების შედარებით მაღალ საფეხურის ნაყოფია და ამიტომ **მატარებელი** ეგრ. წოდ. „სოციალურ ორგანოებისა“. მე ვეთანხმები ავტორს იმაშიც, რომ ხალხი „მასალაა“, რომლისაგან „ეთამთა ვითარებაში“ ყალიბდება ცოცხალი ორგანიზმი—ერი, მაგრამ საკვირველია, რომ ამ ჩამოყალიბების პროცესს ის ერთხელაც კი არ ეხება. სამაგიეროთ ის არქეოლოგიურ ექსკურსიასაც კი ახდენს და დილექტანტურათ იკვლევს წიგნის ერთ-ერთ თავში ქართველ ერის ასავალ-დასავალს უხსოვარ დროიდან, მაგრამ ამ ვარჯიშობის ქამს მას ერთხელ არ მოსდის თავში სწორეთ ამ ერის ხანგრძლივ საზოგადოებრივ ცხოვრების ისტორიულათ გათვალისწინება და მხოლოდ ამ გზით ცნება ერის მეცნიერული განსაზღვრა. რამდენათ მაღლიანი იქნებოდა, მაგ., თუ გინდ ასეთ პრობლემის დასახვა: თავის გრძელ და რთულ ისტორიის რომელ ხანაში იქცა ქართველობა ერად?

ან იქნება ალაროდელნი, ეს, თანახმათ ცნობილ ჰიპოტეზისა, ქართველობის უძველესნი წინაპარნი, ნამდვილ ერს წარმოადგენდენ?! ავტორის ენაწყლიანობიდან კი იმ დასკვნის გამოყვანა შეიძლება, რომ ქართველი ერი, როგორც ასეთი, მრავალ ასეულ და ათასეულ წლების წინეთაც არსებობდა. თავის თავათ მისახვედრია, ქართველთა მოდგმის ისტორიას არა ერთ ათას წლის წყვილიდში აქვს ფესვები გადგმული, მაგრამ ამის კვლევადიება ავტორს მასზე უფრო კომპეტენტურ პირთათვის უნდა დაეთმო და თვითონ კი, თუ ფხა შესწევდა, ხსენებულ მოდგმის ერად ჩამოყალიბება დაენახვებია მკითხველისათვის. პირველ მიზნისთვის—არქეოლოგიურ განავარდებისათვის—მან ჰპოვა ნავთსაყდური ახალგაზდა

მკვლევარ ჯავახიშვილის ნაწერებში, ხოლო რედაქციის
 ეხება მეორე მიზანს—ქართველობის სოციალურ-ეკონომიკურ
 გაშუქებას,—ამ შემთხვევაში მას არ დაურჩა არც ერთი
 ავტორიტეტი, ასე რომ ეს შრომა დიახაც არ იყო მის-
 თვის „სარფა“, როგორც მისი მეგობრები იტყოდნენ.

ავილოთ ავტორის მიერ ცნება ერის განსაზღვრა
 და ახლა დავაკვირდეთ მას. ერი არის, ამბობს ავტორი,
 ერთგვარი გარეგნულათ მოწესრიგებული სოციალური
 ორგანიზმი, რომლის სიცოცხლესა და მთლიანობას ნა-
 თელყოფს თავისებურება ენისა, სარწმუნოებისა, მეცნი-
 ერებისა, ზნეობისა, ხელოვნებისა, სამართლისა და პოლი-
 ტიკისა, და რომელიც განხორციელება განსაკუთრებულ
 ისტორიისა, ტიპისა, თვითშეგნებისა, ერთი სიტყვით,
 სრულის ინდივიდუალობისა. მეტია იმაზე ლაპარაკი, რომ
 ამ განსაზღვრაში ორიგინალური არაფერია, იგი გამოუ-
 თქვამს გაცილებით უფრო ნათლათ და მარტივათ ბევ-
 რი სხვა ავტორის ადრე, აგრეთვე მზგავს მრავალ-სართუ-
 ლიან განსაზღვრას, ეგრ. წოდ. იტალიური სკოლა ექო-
 მაგება და სხ. ამ განსაზღვრის მთავარი ნაკლებანება იმა-
 ში მდგომარეობს, რომ ის შეიცავს ყველაფერს და თანაც
 არაფერს: ყველაფერს—იმ აზრით, რომ მასში აღარაფე-
 რია გამოტოვებული ცა და დედა-მიწის შუა; არაფერს—
 იმ აზრით, რომ ავტორი არ გვითითებს სახელდობრ
 რომელია მათ შორის ყველაზე უფრო დამახასია-
 თებელი ანუ სპეციფიური მისგან განსაზღვრულ ცნე-
 ბისათვის.

სულაც არაა საკმარისი მგზავსათ ავტორისა შაბ-
 ლონურათ ჩამოთვლია ენისა, სარწმუნოებისა, ზნე-ჩვე-
 ულებისა და ბევრი სხვა „ორგანოებისა“, ამით დღეს
 მაინც ფონს ვერ გახვალ. და ეს კიდევ უფრო იმიტომ,
 რომ ხსენებულ „ორგანოების“ უთავბოლო ხმარების

მეოხებით ხშირათ არა-სასურველ შედეგებს ვღებულობთ.
 „რამდენადაც ერებს იდენტიური, საერთო ორგანოები აქვსთ—ამბობს ავტორი—, იმდენად ერი საერთო ცნებას წარმოადგენს, რამდენადაც ორგანოები განსხვავდებიან ერთმანეთისაგან თავისთავად, იმდენად ერს აქვს თავის ინდივიდუალობა.“ (128). ეს ციტატი გამოხატავს ავტორის იმ აზრს, რომ ყველა ერებს აქვთ ენა, სარწმუნოება და სხვა „იდენტიური, საერთო ორგანოები“, ხოლო თვითველ ერს, კონკრეტულათ აღებულს, აქვს განსაკუთრებული სხვა ერთაგან „განსხვავებული“ ენაც სარწმუნოებაც და სხ.

მე მაინტერესებს კონკრეტული ერი. ავიღოთ თავდაპირველათ ენა. ყოველ ერს, ავტორის აზრით, აქვს განსაკუთრებული ენა, მაგ: ინგლისელთ—ინგლისური ენა, ფრანგთ-ფრანგული და სხ. მაგრამ ვინ არ იცის, რომ ხშირათ ორი, თვით ორზე მეტი ერი ერთსა და იმავე ენაზე ლაპარაკობს. საქმარისია დავასახელოთ ინგლისელი, ირლანდელი და ჩრდილო ამერიკელი, რომელთაც, მიუხედავათ მათ საერთო ენისა—ინგლისურისა—, თავი სხვა და სხვა ერის წარმომადგენლებად მოაქვთ. მეორეს მხრით, შესაძლოა ერთსა და იმავე ერის წევრნი სხვა და სხვა დედა-ენაზე ლაპარაკობდენ, მაგრამ ამით დიხაბაც არაფერი უშავდებოდეს მათ ეროვნულ მთლიანობას, ან უკეთ—ჰომოგონობას,—ასეა საქმე ჩრდილო ამერიკის შეერთებულ შტატებში და საზოგადოთ ევროპიელთა განუწყვეტელ ემიგრაცია—იმმიგრაციისაგან წარმომდგარ, შედარებით ახალ ერებში. მე არარას ვამბობ მრავალ კილოკავებზე (idiomes), რომელნიც ხშირია ამა თუ იმ ერში და ძალზე შორდებიან მასში გაბატონებულ სალიტერატურო ენას, მაგ.: procencale საფრანგეთში plattdeuth გერმანიაში, მეგრული



ჩვენში... მეტია იმაზე სიტყვის გაგრძელება, რომ **სარწმუნოება** ამ მხრივ გაცილებით მეტ მრავალფეროვნებას იძლევა: კათოლიკობა ერთია, მისი ამლიარბელი კი **მრავალი ერთი** ფრანგი, ესპანელი, უნგრელი და სხ.), ასეა მართლმადიდებლობაც (რუსი ბერძენი, ქართველი და სხ.), შემდეგ ლიუტერანობაც (გერმანელი, შვედელი, დანელი და სხ.)... მრავლისაგან მრავალი სექტები კიდევ სხვაა, ადრეთ ინგლისი და რუსეთი. რაც შეეხება მეცნიერებას, ეს ისეთი „ორგანოა“, რომ, იმედია, მკითხველი არც კი მომთხოვს მაგალითებს, ან სხვა სიტყვით — იმის დამტკიცებას, რომ ინგლისელთ, რუსთ, ამერიკელთ, იაპონელთ და ბევრ სხვებს **ერთი და იგივე** მათემატიკა, ბიოლოგია... აქვთ! სამართალზე, პოლიტიკაზე და სხვებზე შემდეგ თავში მექნება ბაასი, ახლა ესეც კმარა.

ზემო თქმულიდან საკმაო ნათლათა სჩანს, რომ ესა თუ ის „ორგანო“ ხშირათ „იდენტიურია“ ორ და ორზე მეტ **კონკრეტულ** ერთათვის, რომ ერთი და იგივე ერთი, მეორეს მხრით, ხშირათ არა „იდენტიურ ორგანოთა“ მატარებელია. აქედან, დასახელებულ შემთხვევებში ცნება ერის გარკვევის მაგიერ ართა სრულ არეუ-დარევის ვლებულობთ.

თქმა არ უნდა, ხშირია ისეთი შემთხვევაც, როცა რომელსამე ერს ახასიათებს ერთი განსაკუთრებული ენა, ერთი განსაკუთრებული სარწმუნოება, მაგრამ ეს როდი ითქმის ისე დაბეჯითებით სხვა დანარჩენ „ორგანოებზე“. ყოველ შემთხვევაში, მე არ მეგულება ისეთი ერთი, რომელსაც ეკონომიკა და პოლიტიკა, მეცნიერება და ხელოვნება მეტნაკლებობით **საერთო** არა ჰქონდეს სხვა მეზობელ ერებთან. ავტორის განსაზღვრა ანგარიშს არ უწევს ამ უბრალო, მაგრამ უპირველეს გარემოებას, ამიტომ ის მხოლოდ-ღა ცალმხრივით აღბეჭდავს სინამდვი-

ლეს. ამას თითქო კიდევ გრძნობს ავტორი, მაგ., გზა-
და-გზა ასეთ მსჯელობასაც წაატყდებით მის წიგნში:
„ერის ინდივიდუალობა, საკუთარი სოციალობა—საკუ-
თარი ენა, ლიტერატურა, სამართალი, პოლიტიკა, სარ-
წმუნოება, — რომელიც მიუხედავად სხვა ერის სარწ-
მუნოებასთან მზგავსებისა იმ სოციალურ წრის ელ-
ფერი ადევს, სადაც იგი დაქვედრებულა...“ (129,
ხაზი ჩემია). როცორც ხედავთ, ავტორს მარტო სარწმუ-
ნოება მიუჩნევია ისეთ „ორგანოდ“, რომელიც შესაძლოა
„ემსგავსებოდეს“ მრავალ სხვა და სხვა ერებში, სხვა
„ორგანოებზე“ კი ის სდუმს, თითქო აქ ყველაფერი რიგ-
ზე იყოს.

მაშასადამე, ხსნა არსაიდან ყოფილა!—შეიძლება
იფიქროს მკითხველმა: მართლაც-და, თუ ერნი თითქმის
ყველაფერში ერთმანეთს წააგავენ, თუ მათ შორის შე-
უძლებელია ნათელ, დემოკრატიულ ხაზის გასობა, მაშ
როგორ განებავთ ცნება ერის განსაზღვრა, თვით უბრა-
ლო ანალიზი? ან კიდევ უფრო გაბედულათ—სჩანს, ერი
არც კი არსებობს ფაქტიურათ, მაშ არ-არსებულის გან-
საზღვრა რომელ ქკუათ-მყოფელს მოუვა თავში?! ასეთი
მსჯელობა ადვილათ ასახსნელია, თუმცა იგი იმავე დრო-
სვე უსაფუძვლოა. პრობლემის სიძნელე კიდევ არ ნიშ-
ნავს მის სწორათ გადაჭრის შეუძლებლობას, საგნის გა-
ურკვევლობა კიდევ არ ნიშნავს მის მატერიალურათ არ-
არსებობას. ბ. Bâton-მა შეეხო ფრიალ მნიშვნელოვან
თანამედროვე თემას, მაგრამ თავი ვერ გაართვა მას, ვერ
მოერია—აი, თუ განებავთ, საქმის ნამდვილი ვითარება.

ყოველ სიძნელის წინაშე უკან დახვევა—ეს ავტო-
რის „უმშვენეირესი“ თვისებაა! ის ძალიან კარგად
გრძნობს, რომ მის თხზულების ერთი მთავარი დანიშნუ-
ლება უნდა ყოფილიყო—აღმოჩენა სახელმძღვანელო

პრინციპებისა, რომელთა შემწეობით შესაძლებელი იქნებოდა ერთა შორის განმასხვავებელ ნიშნების გათვალისწინება, მაგრამ ის ფრთხილათ გატრბის ამას, უკაცრავათ! — ის თითქო რ. ავენარიუსის ე. წ. აღწერილობითს მეთოდს (descriptive Method) იმარჯვებს (1) და წიგნის მე-82-3-ე გვერდზე მოგვიყვება, თუ რა დიდათ განირჩევა ინგლისელთა ოჯახი, მწერლობა, მუსიკა და კიდევ ვინ მოსთვლის — რა სხვა ერთა ანალიტიკურ მოვლენათაგან. აი, ნიმუშიც: „ოქროფორდის უნივერსიტეტი განსხვავდება ჰეიდელბერგისაგან, პარიზის უნივერსიტეტისაგან; რომ დიდი ბრიტანიის იმპერია რესპუბლიკა არ არის, არც გერმანიის იმპერია, — ეს ხომ ყველასთვის საჩინოა.“ კითხულობ ამ ბალღურ ტიტინს და თანაც „საჩინო“ ხდება რომ ბ. Baton მართლაც არა „მეცნიერებისათვის დაბადებული“ მას სულ სხვა ეხერხება, რა — ამასაც შემდეგ გავიგებთ.

* * *

მართალია, ბ. Baton ვერ გამოდგა სერიოზული მეცნიერი, მაგრამ ეს კიდევ არ მოასწავებს მისგან წამოყენებულ ყველაზე უმნიშვნელოვანეს დებულებებს სიყალბეს. მე სახეში მაქვს ერის ორგანიზმობა, სუპერ-ორგანიზმობა ის ამ დებულებასაც სხვას ესესხება, თავის თავით მისახვედრია, თუმცა ეს როდი უშლის მას თავი ისე მოგვაჩვენოს, თითქო იგი, დებულება, არც კი მოლანდებოდეთ, არა თუ გამოეთქვათ, მის იდეურ მოპირდაპირეთ... ეს — სხვათა შორის.

ერი ცოცხალი ორგანიზმია, მაგრამ არა იმ აზრით, რასაკვირველია, როგორც რომელიმე ბიოლოგიორი არსება. მაგ., ცალკე ადამიანის სულიერ-ხორციელ მათლიანობას და ჰარმონიას ვერასოდეს ვერ მიაღწევს მრავალ

ადამიანთაგან შემდგარი ჯგუფი. ასე რომ ამ მხრივ მართოდენ გარეგნული ანალოგია თუ არსებობს ერსა და ცალკე ინდივიდს შორის. ერი სოციალური ორგანიზმია, მაშინ როდესაც ინდივიდი ბიოლოგიური ორგანიზმია; პირველის ზრდა-განვითარების კანონები სულ სხვაა, ვინემ მეორესი.

მაშასადამე, ერის არსებითი მხარე მისი სოციალობაა და ისიც ისეთი სოციალობა, რომელიც უდრის ადამიანთა ურთიერთობის იმდენათ მაღალ ხარისხს, რომ ჩვენ ნება გვცდლევა ერს ცოცხალი, თუმცა თავისებური ორგანიზმი ვუწოდოთ. ასეთ ორგანიულ ურთიერთობას ჰქმნის ადამიანთა განსაზღვრულ ჯგუფების ერთათ ცხოვრება საუკუნეთა განმავლობაში; ერთსა და იმავე ბუნების წიაღში, ერთსა და იმავე ფსიხიურ და მატერიალურ მოვლენათა გავლენის ქვეშ. ერთი და იგივე ფიზიკური და სოციალური არე ანუ სფერა — აქედან ერთი და იგივე ფსიხიური განცდა. ერთი და იგივე თავგადასავალი ხანგლივ ისტორიულ ქარტეხილში — აქედან ერთი და იგივე სულიერი ფიზიონომია, ანუ ხასიათი.

ერთი ერი განსხვავდება მეორე ერისაგან. თქმა არ უნდა, ერთიცა და მეორეც ორგანიზმი არის და ერთსა და იმავე მასალისაგან — ადამიანთაგან შემდგარი. არც ისაა გასაკვირი, რომ მათი მეზობლობა ტერიტორიალურათ, აგრეთვე მათი სოციალ-ეკონომიურ ვითარების ახლო მზგავსება მეტის-მეტათ აძნელებს განმასხვავებელ ნიშნების გამოჩინებას, ყოველ შემთხვევაში, ასეთი სპეციფიური ნიშნები არსებობს, ეს უტყუარი ფაქტია. ასე წარმოიდგინეთ, ისეთ რთულ შემთხვევაშიც კი, როგორცაა ორ და ორზე მეტ ერის წევრთა ერთა და იმავე ენაზე ლაპარაკი, სულაც არაა შეუძლებელი ამ ერთა ურთიერთ განსხვავების ნათელყოფა სწორეთ ენის მხრი-



თაც. ბრიტანელი, ირლანდიელი და ჩრდილო-ამერიკელი ერთ ენაზე-ინგლისურზე ლაპარაკობენ, მაგრამ თვითეულის გამოთქმა, ბევრ, თვით ლექსთა წყობა, ან კიდევ მრავალ, მხოლოდ ადგილობრივ ხმარებულ სიტყვების მომარჯვება მაშინვე გვამცნევს რომელი რა ერს ეკუთვნის.

თვითეულ ერსა აქვს მეზობელ ერებთან საერთო, მაგრამ იმავე დროსვე განსაკუთრებული ისტორია, რაცა ჰქმნის მის განსაკუთრებულ თვისებათ. ამის მიზეზია არა იმდენათ სოციალურ მოვლენათა სხვადასხვაობა, რამდენათ ამ მოვლენათა ესა თუ ის კომბინაცია თვითეულ ერში. ამ გვარათ, ერი არის ადამიანთა უმკიდროვესი შედუღება coherence მაგრამ თვით ამ შედუღების პროცესი სხვა და სხვა ერში სხვადასხვანაირი ყოფილა და არის, ვინაიდან სოციალურ მოვლენათა კომბინაციები უთვალავია. სხვა რომ არ იყოს, მარტო განვითარების ხარისხი, რომელიც სხვადასხვაა სხვა და სხვა ერში, საკმაო ნათლათ მოწმობს ამას.

ერი არა მარტო ისტორიულ კათეგორია არის, არამედ ის შედარებით ახალ დროის პირმშოცაა. მისი დაფუძნება (Konstituierung), თუ შეიძლება ასეთქვას, არც ისე დიდი ხანია რაც მოხდა. განა უხსოვარ დროიდან არსებობდა სხვადასხვაობა მოდგმათა, ხალხოსნობათა ერთ, სარწმუნოებდით, ზნე-ჩვეულებით და სხ., მაგრამ მაშინ ერი მისი თანამედროვე გაგებით არსად სჩანდა, არ არსებობდა თვით ეროვნული საკითხიც. ასე იყო საქმე საშვალ-საუკუნოებში, რა უნდა ყოფილიყო მის აღრე? სოციალობა მაშინაც არსებობდა, რა საკვირველია. მაგრამ იგი იყო დაბალ საფეხურის, დაბალ ხარისხის. იგი ემყარებოდა უფრო ოჯახზედ ან უკეთეს შემთხვევაში—თემზედ, გვარზედ ფეოდალზედ. ადამიანთა ახლო კავშირი გამოიძნობოდა შთამომავლობით, სისხლით, ან უკეთეს

ლიერ სიმდიდრისა კულტურაა, სხვა არაფერი, ერის ამ წოდ. გენიოსობაც აქედან წარმოსდგება. აქედან კემ-მარატი პატრიოტიც ის არის, ვინც კულტურას, ეროვნების ამ გულსა და ღვიძოს იცავს. ჩვენს დროში ერს იცავენ არა შთამომავლობის, არა სარწმუნოების სახელით, არამედ **კულტურის სახელით.**

თვითშეგნება, ინდივიდუალობა, რომელსაც იხსენიებს აგრეთვე ბ. Bâton-იც თავის განსაზღვრაში, ყოველ სრულ-ასაკოვან ერის აუცილებელ, თანდაყოლილი თვისებაა, — უამისოთ ერი ვერ ერობს. ის არაა ორგანიზმი. სრულ-ასაკოვან ერის თვითეულ წევრს გულის სიღრმემდე სწვდება საერთო სამშობლოს ყოველი ფათერაკი, რადგან ამით ფათერაკი მოელის თვით კულტურას, ამ დიად განძს ეროვნულ ცხოვრების დაუცხრომელ სრბოლისას, ამ ფერად ბაღნარს, რომლის გარეშე მას სული ეხუთება.

ამ რიგათ, თავი და თავი ერში ფსიხოლოგიური მომენტია. ერი არის ისეთი სოციალური ორგანიზმი, რომლის ხორცშესხმულ არსებობას, როგორც ხელუხლებელ და განყოფილ ინდივიდუალობისას, ინსტიქტიურათ გრძნობენ და ინტელექტუალურათ სჭვრეტენ თვით მისი შემადგენელნი წევრნი.



II

კაცობრიობა.

ბ. Bâton გაგულისებულია. ის დიდ ჭაპან-წყვეტაში იყო, ბევრი ოფლი დაღვარა, საშინლათ მოიქანცა, და აბა რალა გასაკვირია, თუ ცუდ გუნებაზე დადგა. თუ არა გჯერათ, ჩაიკითხეთ ორიოდ სტრუქონი მის მიერ ცნება ერის განსაზღვრის ქვევით: „აი რა არის ერი. მას კი აბუჩად იგდებენ უვიცნი და ფიქრის არა მქონენი. მათ სურთ კაცობრიობის დიდი სახელით დაჩრდილონ ეს უადრესი სოციალური სინამდვილე. ხოლო უბედურება სწორედ ის არის, რომ კაცობრიობა ამ სინამდვილესა.“ (131). როგორც ხედავთ, ეს „უვიცნი და ფიქრის ნიქის არა მქონენი“ რომ არ დაებადნა ღმერთს, ბ. Bâton-ს დიახაც არ დასკირდებოდა ამდენი წვა-დაგვა და ტვინის გამომლაყველი ჩიჩინი! ხოლო თუ მაინც არ დაგიშლიათ და მოწიწებით მოახსენეთ მას, რომ გინება და ლანძღვა უადგილოა ჯერ კიდევ საპოლემიკო ნაწერებში, არა თუ „მეცნიერულ ტრაქტატში,“ — თქვენ ამით ერთგვარ რისკს ეწევი: ავტორი არა თუ არ მოგიბოდიშებსთ, პირიქით უფრო მწარე ისარსაც გტყუარცნისთ — „სხვისი ფეხის ამყოლ პიგმეებად“ მოგნათლავსთ! (იქვე).

ესა და ბევრი სხვა „საგონებელი“ ადგილები აშკარათ მოწმობს, რომ ჩვენ საქმე გვაქვს არა სერიოზულ მოაზრესთან, ან კიდევ პასუხმგებელ მკვლევართან, არამედ გაწიწმატებულ პამფლეტისტთან, უკეთეს შემთხვევაში — ისეთ პუბლიცისტთან, რომელიც, რუსების არ იყოს, კრ. ВПК-ია სიტყვა-პასუხში. მეცნიერს სძლია პუბლიცისტმა, პუბლიცისტს — პამფლეტისტმა.

ავტორის ამ უგუნებობასა და ერთობ მწყრალ სუ-

ლის-კვეთებას ზედმიწევნით შეეფერება თვით მიზანშეწონილი შრომისა მართალია, მან ამ თავითვე დაგვიანდა, რომ ის გაარჩევდა მთელი სიგრძე-სიგანით „რა არის კაცობრიობა და რა არის ერი“ მაგრამ ეს არაა ფაქტიურათ მისი ზრახვა და წადილი,—მას ნიშანში ამოუღია და სიმძიმის მთელი ცენტრი დაუმყარებია მეორე კითხვაზედ — „შეეწირება თუ არა პირველს მეორე,“ ე. ი. კაცობრიობას ერი?

საქმე იმაშია, რომ ჩვენს კულტურულ ქვეყანაში აღმოჩენილან ისეთი თავზე ხელალებულნი, ისეთი „პიგმეები“, რომელთაც არც კი უწამებიათ ერი, სამაგიეროთ კაცობრიობას გაგორებიან წინ! და ეს თავხედობაც რომ არ უკმარებიათ, ცოცხალი ერი დაუკლავთ და „თავ-ფეხ-კუჭიანათ“ უსულო კერპის—კაცობრიობის საკურთხეველზე დაულაგებიათ! განა მოსათმენი და შესაწყნარებელი იყო ასეთი უკულმართობა? არა, რა საკვირველია, და... მოგვევლინა ზეცით ვინმე მქუხარა, მყრობელი უშველებელ Bâton-ისა ანუ ჯოხისა, ჩვენებურათ, და ქადაგებს—, „ერი არსებობს, კაცობრიობა არ არსებობს,“ ერი არის ღმერთი და Bâton მისი წინასწარმეტყველი!

ასე თუ ისე, მან დიდი განძი შესძინა მეცნიერებას, ვინაიდან ერთხელ და სამუდამოთ დაამტკიცა ერის არსებობა ქვეყანასა ზედა! განა ვინ უარყოფდა ერის არსებობას?—შეიძლება აზრათ მოუვიდეს ვისმეს. არც არავინ, მაგრამ აკი დაეინახეთ, ბ. Bâton სულაც არ ხუმრობს, რა ეხუმრება—ბრაზდება კიდევ, რომ ასეთი „უჯერო თომანი“ თმის სისქე ყოფილან ჩვენში.

მაშ ახლა კბილი გაუსინჯოთ ავტორის მსჯელობას „არ არსებულზე“ —კაცობრიობაზე.

მე ერთ ალაგას შევნიშნე, რომ ავტორს სჩვევია

ჰიპერბოლური აზროვნება. ყოველსავე აზრის და დებულებების მეტის-მეტათ გადაჭარბება-გადამლაშება მის თანდაყოლილ და აღმოუფხვრელ თვისებას წარმოადგენს. აქაო-და, ვინაიდან კაცობრიობას არ მოეპოვება „ორი უპირველესი თვისება:“ ერთი საერთო ენა და სახელმწიფოებრიობა (80, ესეც მეორე ახალი აღმოჩენა!), ამიტომ კაცობრიობა, ავტორის აზრით, უბრალო სოციოლოგიური ცნებაც კი არა ყოფილა თურმე. აი, დაუგდეთ ყური თვითონ მას, კაცობრიობა მილიარდ-ნახევარ ადამიანთა უბრალო ჯამია, ამბობს ავტორი, და ამას ისე ხსნის: „რა საკვირველია, თუ არსებობს ცალკე ადამიანი, თუ არსებობენ ცალკე ადამიანები, მათი საერთო რიცხვის არსებობაც სინამდვილეა, — ამ მხრით მაშასადამე, კაცობრიობაც არსებობს, მაგრამ ამგვარადვე არსებობენ მაიმუნები, ლომები, არწივები, არსებობს მათი საერთო რიცხვი, არსებობს ამ ცხოველთა სახე, როგორც ყველა სხვა ცხოველთა, მაგრამ ეს ვერც იქა (აქა?) ჰქმნის ვერავითარ სოციალურ მოვლენას. და თუ ასეთი თვალსაზრისით განვიხილავთ კაცობრიობას, ვერასოდეს ვერ გამოვალთ ბიოლოგიურ და ანთროპოლოგიურ კვლევათა წრიდან, რადგანაც ადამიანი, როგორც Homo Sapiens. ამ მეცნიერთა საგანია, და არა იმ მეცნიერებისა, რომელიც იკვლევს სოციალობის განსაკუთრებულ მოვლენათა ხასიათსა, სოციალურ პროცესს, — იგი არ არის საგანი სოციოლოგიის მეცნიერებისა.“ (55—6, ხაზი ჩემია).

ამ გრძელ ტირადის მოკლე აზრი იმაში მდგომარეობს, რომ კაცობრიობასა, ერთის მხრით, და დანარჩენ ცხოველთა სამეფოს შორის, მეორეს მხრით, სრული ანალოგია არსებობს. თავის თავათ მისახვედრია, ადამიანი, როგორც ყველა სულდგმულ არსთა ერთ-



ერთი უმაღლესი სახე, როგორც Homo Sapiens, მარტოდენ ბიოლოგიურ მეცნიერებათა სფერას ეკუთვნის, მაგრამ ეს საანბანო რამე როდია საინტერესო... საინტერესო ისაა, რომ ავტორს ამაზე **გაცილებით მეტ** რამის დამტკიცება მოუწადინებია, და მკითხველიც სწორეთ **ამას** უნდა დააკვირდეს ბეჯითათ. მართლაც და, რას გვეუბნება ავტორი? იმას, რომ კაცობრიობის შემადგენელ ადამიანთა შორის მზგავსათ მაიმუნ-ლომებ-არწივებისა **უადგილოა და შეუძლებელი** ყოველივე „განსაკუთრებული სოციალური მოვლენა,“ რომ ისინი მარტოდენ ერთ-ერთ ბიოლოგიურ სახეს ეკუთვნიან და ამიტომ მათი სათითაოთ და ერთათ (ადამიანი-კაცობრიობა) აგრეთვე სოციოლოგიურათ განჭვრეტა დიდი უზიანობაა, მეტი არაფერიო. მაშ რად დააწერა ავტორმა თავის თხზულებას სათაურად: **„ერი და კაცობრიობა, განხილულნი სოციოლოგიური მხრით?“**— შეიძლება იკითხოს ვინმემ სრულის სამართლიანობით. განა ვინ იხილავს ცხოველთა მოდგმას, მაგ.: მაიმუნებს, ლომებს, არწივებს სოციოლოგიური მხრით?! არავინ. ადამიანთა ერთი ჯამი (ერი) ჰქმნის სოციოლობას, ხოლო იმავ ადამიანთა მეორე ჯამი (კაცობრიობა) არა ჰქმნის სოციოლობას, აქედან—ასკენის ვტორი,—ერი **სოციოლოგიური** ცნებაა, ხოლო კაცობრიობა **ბიოლოგიური ცნება!** აი, სწორეთ ამაზე იტყვიან--ბაყაყმა იბერა, იბერაო და.....

ჩვენს ავტორს თან დაყოლილი აქვს აგრეთვე **მეორე** უკურნებელი სენი—ესაა აბსოლიუტურათ მსჯელობა, მისთვის არ არსებობს რელატივური აზროვნება, ან სხვა სიტყვით—ამა თუ იმ მოვლენის რელატივურათ წარმოდგენა. ჩვენ ვამბობთ, და სრულიად სამართლიანათაც, რომ კაცობრიობა არ წარმოადგენს ისეთ „გარეგნულათ

მოწესრიგებულ და სოციალურ ორგანოთა“ მატარებელ აგებულობას, როგორც ერი, მაგრამ ასეთ მსჯელობას თავისი გონიერი საზღვარიცა აქვს, რაიცა მოასწავებს იმას, რომ მოყვანილი დებულება მხოლოდ-ღა რელატი-**ვურ** ხასიათისაა, არც მეტი, არც ნაკლები. ერი თავდაცმუ-ლი გუდა როდია, რომლის შიგნიდან და გარედან თი-თქო უბრალო სიოსაც არ გაექაქანებოდეს. არა, ის მუ-დამ ღიაა და თანაც მეტის-მეტათ მგრძნობიარე გარეშე გავლენათა შესათვისებლათ. ყოველი სოციალური მოვ-ლენა, მის არსში დატრიალებული, ერთსა და იმავე დროს დაზახსიათებელიცაა მისთვის და შეიძლება არც იყოს, რამდენათ ესა თუ ის მოვლენა მზგავსია ანუ იდენტიური აგრეთვე მეორე და მესამე ერისათვის. ყოველ სოცია-ლურ მოვლენას აქვს, ასე ვთქვათ, გაგანიერების შეკუ-მშვის თვისება: იგი დიდდება, ერთ შემთხვევაში, კარ-გავს მეტ-ნაკლებობით ადგილობრივს, ეროვნულ ფიზიო-ნომიას, მას ვერ იტყვს მის წარმომშობ ერის ფარგ-ლები და ხდება, თუ კაცობრიობის არა, მრავალ ერთა კუთვნილება; იგი პატარავდება, მეორე შემთხვევაში, ე. ი. თან და თან იკლის გარედან მოცხებულ ნიშნებს, იძრობს ძველ ქერქს და ეხვევა მთლათ ახალ ეროვნულ სამოსელში,—მაშინ ის ერთი ერის კუთვნილებაა. მაგ-რამ ორთავე კათეგორიის მოვლენანი მხოლოდ და მა-რტო რელატიურათ უნდა გვესმოდეს, რადგან ისინი მუ-დმივ ცვალობადობის და გარდაქმნის პროცესში იმყო-ფებიან.

ამ განყენებულ მსჯელობის ლოდიკური დასკვნა ისაა, რომ **ერთფეროვნებას** ერთის მხრით, და **მრავალ-ფეროვნებას** მეორეს მხრით, არა აქვს დასაბამი და არც დასასრული ადამიანთა საკაცობრიო თუ საეროვნო ცხოვ-რებაში. ავტორს არა სჯერა ეს და ამბობს—მრავალფერო-



ვნება დაუსრულებელია, ხოლო ერთფეროვნება არც შესაძლებელია და არც სასურველია. (306—371). ავტორი ურევს აქ ერთმანეთში ორ სხვა და სხვა პრინციპს: ფილოსოფიურ-აბსოლიუტურს და მეცნიერულ-რელატივისტურს. პირველი, ე. ი. ფილოსოფიურ-აბსოლიუტური პრინციპი მართლაც უარყოფს ერთ ფეროვნებას, რადგან ქვეყნის კიდით-კიდეზე არ მოიპოვება ამ თვალსაზრისით, ორი სრულიად იდენტიური საგანი თუ მოვლენა; მეორე ანუ მეცნიერულ-რელატივისტური პრინციპი კი ლაღადებს, რომ ურიცხვია სწორეთ იდენტიური საგნები თუ მოვლენანი. ეს ორი პრინციპი თანაბრათ სამართლიანია, მაგრამ თანაბრათ როდია ნაყოფიერი. პირველს საქვე აქვს აბსოლიუტებთან, ხოლო მეორეს რელატივებთან. ვინ არ იცის, სოციოლოგნი ამყარებენ თავიანთ საბოლოო დასკვნებს სოციალურ მოვლენათა გამოკვლევა-შესწავლაზედ, ხოლო რაში გამოიხატება ეს კვლევა-ძიება, თუ არა იმაში, რომ ისინი უფარდებენ ერთმანეთს ხსენებულ მოვლენათ, აწესებენ მათ შორის მზგავსებას და ვანსხვავებას: თვით მოვლენათა უბრალო კლასიფიკაციაც ხომ შეუძლებელია უამისოთ. რას ნიშნავს ეს? იმას, რომ სოციალურ მოვლენათა მრავალფეროვნებასთან ერთათ უთუოთ დაშვებულ უნდა იქნას აგრეთვე მათი ერთფეროვნებაც. თუ ესა თუ ის სოციოლოგი ერთმანეთზე აწებებს ორს და მეტ მოვლენებს და აქედან რაიმე მეცნიერული დასკვნა გამოჰყავს.—ეს იმის მომასწავებელია, რომ ის ამ შემთხვევაში მოვლენათა იდენტიტობის ანუ ერთფეროვნების თვალსაზრისიდან გაჰადის. მაგრამ ერთ წუთშიც არ უნდა გვავიწყდებოდეს, რომ ხსენებული ერთფეროვნება მარტოდენ რელატივისტურ ხასიათისაა, რომ ბოლოს და ბოლოს

ჩვენ საქმე გვაქვს მზგავსებასთან და არა ერთ-იგივობასთან.

ვინაიდან ამ თეორიულ სჯა-ბაასს გადაწყვეტი მნიშვნელობა აქვს ჩვენს შემთხვევაში, ამიტომ მე ნებას მივცემ ჩემს თავს ცოტა ხნით კიდევ განვაგრძო ის. ცნობილია, მაგალითათ, ამერიკელმა გამოჩენილმა სოციოლოგმა მორგანმა დაწვრილებით გამოიკვლია და შესწავლა იროკუზთა ცხოვრება, მათი ადათნი, ზნე-ჩვეულებანი, ოჯახური თუ გვაროვნული განწყობილებანი და სხვა და სხვა არა ნაკლებ ცნობილია ისიც, რომ მორგანის თხუზულების გამოქვეყნების შემდეგ მეცნიერებმა ბევრი განმაცვიფრებელი მზგავსება დაინახეს იროკუზთა, ერთის მხრით, და ძველ ბერძენთა, გერმანელთა და სხვა ხალხოსნობათა ცხოვრებას შორის, მეორეს მხრით. ამის შემდეგ დიდათ განვითარდა პირველყოფილ კულტურის შესწავლის საქმე. აღმოჩნდა, რომ თანამედროვე ველურების და ბარბაროსთა ცხოვრების შესწავლა დიდათ გვეხმარება თვით ჩვენი უხსოვარ წარსულის გასათვალისწინებლათ და შესაგნებათ. მაგრამ იბადება კითხვა, რაზედ ამყარებენ კულტურის ეს აუარებელნი მეისტორიენი და სოციოლოგნი თავიანთ უთვალავ ტომებში გამოთქმულ დასკვნებს? იმაზედ. უეჭველათ, რომ დაახლოევებით მზგავსი ვითარება იწვევს დაახლოევებით მზგავს შედეგებს, ან სხვა სიტყვით—მოდგმანი მიუხედავათ მათი მრავალ-ფეროვნებისა ძალიან ხშირათ ერთფეროვან სოციალურ მოვლენათ წარმოშობენ ხოლმე. ჩვენ ვიცით, მაგალითათ, რომ მწყემსური ცხოვრება მრავალ სხვა და სხვა მოდგმაში დაახლოევებით ერთგვარ ზნესა და ადათს აბატონებს, რომ პატრიარქალურ ხანაში დაახლოევებით მზგავსი უფლებრივი და ნათესაეური წარმოდგენა სუფევდა გეოგრაფიულათ ერთმანეთისგან ძალზე დაშორებულ თემებში.....

მაგრამ რაღა გავაგრძელო, განა ბ. Bâton-საკითხვე
 ძლო თვითვეულ კონკრეტულ ერის ინდივიდუალობაზე
 სჯა-ბაასი, უბრალო კრინტის დაძვრაც კი, თუ ის იმავ
 დროსვე სრულიად უარყოფითათ მოეპყრობოდა სოცია-
 ლურ მოვლენათა ერთფეროვნებას? განა თვითონ ის არ
 ამტკიცებს, რომ ერთ რომელსამე ერის წევრნი **ემგზა-
 ვსებიან** ერთმანეთს ტიპით, ენით, სარწმუნოებით, ზნე-
 ჩვეულებით....? განა ეს არსებითათ იგივე არ არის,
 რასაც ზევით ვამბობდი? ახლა მოვიმარჯვოთ ავტორის
 მიერ დაჩემებული ცალმხრივი ე. ი. **აბსოლიუტურ** თვალ-
 საზრისი და ახლო დავაკვირდეთ მის მსჯელობას ერზე:
არ არსებობს ორი იდენტური მოვლენა,—მაშ სა-
 იდან გაჰოატყვირა ავტორმა ერის არსებობა?! რისი
 მაქნისია, მაგალითათ, ამა თუ იმ ერის წევრთა
 რაღაც ორგანიული, ფსიხიური კავშირი, როცა თავის
 თავათ ცხადია, რომ სწორეთ ეს წევრნი სათითაოთ
დიდათ განსხვავდებიან ერთმანეთისაგან, როცა თვით-
 ეული მათგანი **სრულიად თავისებური და განსაკუ-
 თრებული პიროვნებაა?** ამ გვართ, ცხადია, რომ
 ავტორის ვითომდა მეცნიერული თვალსაზრისი ძირიან-
 ფესვიანათ არღვევს ერის მთლიანობას, მის „სუბერ—და
 ჰიპერორგანიზმობას“, რაიცა თვით მისივე „ყოფნა-
 არყოფნის“ საკითხია.

საზოგადოთ გადაჭრით შეიძლება ითქვას, რომ
 არამც თუ ერის საფუძვლიანათ გარკვევა, არამედ ყოველ-
 გვარი სოციალური მეცნიერებაც კი ფუჭი და უნაყო-
 ფო წყლის ნაყვა იქნებოდა, ბ. Bâton-ის აბსოლიუტურ
 აზროვნებას რომ მეცნიერთა შორის ფეხი მოეკიდნა.
 სოციოლოგია ცდილობს, სხვათა შორის, მოვლენათა
 მიზეზ-შედგვის გამონახვას და მით კანონ-შეწონილობის
 (закономѣрность) დაწესებას საზოგადოებრივ ცხოვრე-

ბაში მაგრამ თუ რაიმე ეგრ. წოდ. მეცნიერულ კანონაზღვე შეიძლება სოციოლოგიაში ლაპარაკი,—ეს მხოლოდ და მარტო იმ აზრით, რომ არსებობენ იდენტიური ანუ ერთფერი სოციალური მოვლენანი, რომელთა ესა თუ ის **თანაბარი** კომბინაცია იწვევს სხვა და სხვა დროს და სხვა და სხვა ალაგას ამა თუ იმ **თანაბარ** შედეგებს. აქედან, მრავალ-ფეროვნებაში ისეთაირათვე გამოსქვივის ერთფეროვნება, როგორც ერთფეროვნებაში მრავალ-ფეროვნება, თვითთული ეს ცნება რელატიურ ხასიათის და მნიშვნელობისაა და ჩვენც ასე უნდა გვესმოდეს ისინი.

მაშასადამე, ვიხელმძღვანელოთ ამ ერთად ერთ მეცნიერულ-რელატიურ თვალსაზრისით და ახლო დავაკვირდეთ ავტორის მსჯელობას კაცობრიობისა და ერის შესახებ.

როცა ჩვენ ვამბობთ კაცობრიობის ფორმალურ-იურიდიულათ არ-არსებობაზე, ამით ჯერ კიდევ არ მტკიცდება თითქო კაცობრიობა მის შემადგენელ ადამიანთა უბრალო სუმა იყოს და მეტი არაფერი. ჩვენ ვამჩნევთ სინამდვილეში ამა თუ იმ ხარისხის **უტყუარ სოციალობას** აგრეთვე კაცობრიობის შემადგენელ ცალკე ადა მიათა თუ იმავე ადამიანთა მთელ ჯგუფებ შორის.

მაგრამ.... სწორეთ აქ წამოიჭრება ბ. Bâton და მოგვიყვება თავისებურ დიაკნურს ეგრ. წოდ. „კაცობრიობის ფონდის“ შესახებ. (262—307). კაცობრიობა რაღაც ნახევარ მილიარდ კულტუროსან ევროპიელთაგან მარტო როდი შესდგება—გვეუბნება გაწიწმატებული—, ავტორი, არამედ მასში შედის აგრეთვე მთელი მილიარდი **არა-ევროპიელთა** ეს ვეება „ფონდი კაცობრიობისა“, რომლის ნაწილნი კულტურის სხვა და სხვა საფეხურზედ დგანან—ველურობიდან დაწყებული ძალზე განვითარე-



ბულ რთულ საზოგადოებრივობა —, და რომელნიც მიუხედავად ამისა, ან უკეთ — უფრო ამიტომ სრულიად არ იმყოფებიან რაიმე სოციალურ დამოკიდებულებაში პირველათ დასახელებულ ევროპიელებთან. აბა დაამტკიცეთ — გვიწვევს შუაგულ მოედანზე ავტორი — ბუშმენ — ჰოტენტოტთა, ერთის მხრით, და ევროპიელთა შორის, მეორეს მხრით, რაიმე სოციალობა! არა, ამას ვერ დაამტკიცებთ! — ხმას იმაღლებს ავტორი და დასკვნის: რას მიქვიათ კაცობრიობაზე ლაპარაკი მანამდე, „სანამ სულ მთლად არ ამოიწურება ფონდი კაცობრიობისა და მთელი მილიარდ-ნახევარი კაცობრიობა დაახლოვებით ერთ კულტურულ სფეროს არ წარმოადგენს!“ (304)

მე არ გამოვუდგები ავტორის ამ აურ-ზაურს და მხოლოდ მოწიწებით დავეუყენებ მას ერთად ერთ კითხვას: რას იტყვის ის, თუ მაგ., ევროპიელნი, სახელდობრ **ორ და მეტ ერთა** შემადგენელი ადამიანები, ან მთელი ჯგუფნი ადამიანთა სწორეთ **სოციალურ** დამოკიდებულებაში იმყოფებიან ერთმანეთთან? ვთქვათ, არიან „სოციალური მოვლენანი“, რომელნიც **საერთოა** როგორც ინგლისელისთვის, ისე ფრანგისათვის, როგორც გერმანელისთვის, ისე იტალიელისათვის, — რას იტყოდა ავტორი ამ შემთხვევაში, ან უკეთ — რა მოუვიდოდა მის ერთად ერთ სანუკარ დებულებას: **ერის იქით სოციალობა არ არსებობს?** ბუშმენნი და ჰოტენტოტნი მივუშვათ მათ უდაბნოებში, ნუ გვინდა მათი გაწყინება! მე ვფიქრობ, ავტორის ამ დებულების დასარღვევად სულაც არაა საჭირო კაცობრიობის სოციალურ მთლიანობის დამტკიცება, ამ მიზნის მისაღწევად სრულიად საკმარისია დამტკიცდეს, რომ ადამიანთა სოციალობა შესაძლებელია **აგრეთვე ეროვნულ ზღუდეთა გადაღმა**. არსებობს თუ არა რაიმე სოციალობა ამა თუ იმ კონკრეტულ ერის

ფარგლების გარეშე?—აი ის კარდინალური კითხვა, რომლის გარეშე მო ტრიალებს დავა, და მეც აქეთკენ მივაქცევ მკითხველის ყურადღებას. დავიწყოთ უმარტივესიდან.

ჩვენ დავინახეთ, ავტორს დიდათ მოაქვს თავი იმით რომ კაცობრიობა მოკლებულია ერის „ორ უპირველეს თვისებას“: ერთ საერთო ენას და სახელმწიფოებრივობას. კარგი და პატიოსანი, მაგრამ ამით სულაც არ მტკიცდება, რომ ეს ორი თვისება ყველგან და ყოველთვის მარტოოდენ ერთ განსაძღვრულ ერის ნიშნობლივ მხარეს წარმოადგენდეს. ბრიტანელნი და ირლანდელნი, მაგ., ორ სხვა და სხვა ერში შედიან, მაგრამ მათ აქვთ ერთი საერთო ენა, ინგლისური! მეორეს მხრით, შვეიცარიის სამი სხვა და სხვა ეროვნების წარმომადგენელნი ერთ საერთო სახელმწიფოებრივობის ჰერ ქვეშ იმყოფებიან. ამ ორ მაგალითით, რომელთა გამრავლება დიახაც შესაძლებელია, ნათლათ მტკიცდება ის, რომ ესა თუ ის განსაზღვრული ენა ზოგჯერ სცილდება ამა თუ იმ ერის ჩარჩოებს, ვინაიდან ის საერთოა ორ და მეტ ერისათვის, რომ არც სახელმწიფოებრივობა ყოფილა ისეთი რამ თილისმა, როგორათაც ავტორს წარმოუდგენია, ვინაიდან მის ფრთებს ზოგჯერ თავს აფარებს ორი და მეტი ერი. ენა, ავტორის სიტყვით, ერთ-ერთი „უმშვენიერესი სოციალური მოვლენა“ არის, მეორეს მხრით, სახელმწიფოებრივობის ქვა-კუთხედი **სამართალი** არის, — ესეც მეორე „სოციალური მოვლენა“, იმავე ავტორის თანახმათ... დასკვნა? ერის გადაღმაც არსებობენ თურმე სოციალობის ესა თუ ის მოვლენანი და ავტორი ტყულათ ცდილობს ამის წინააღმდეგის დამტკიცებას. სარწმუნოებაც ხომ ამ კათეგორიას ეკუთვნის: ისიც „სოციალური მოვლენაა“ და თანაც **საერთო** მრავალ **სხვა და სხვა** ერთათვის. მეტია ამაზე შეჩერება.



გადავიდეთ უფრო უთანხმოებაზე. კაპიტალიზმის წესწყობილება, რომელიც მეტ-ნაკლებობით გაბატონებულია ევროპის ყველა ერებში და რომელსაც აგრეთვე მეტ-ნაკლებობით ყველგან ერთნაირი შედეგები გამოუწვევია. ავტორი არ უარყოფს ამას და ამბობს, „მსოფლიო კაპიტალიზმის“ მეოხებით „იდენტიური ეკონომიური მოვლენა გაჩნდა ყველა საზოგადოებაში“-ო. მაგრამ შემდეგ სტრიქონებში ის ცდილობს თავისივე თქმულის გაქარწყლებას: „მსოფლიო კაპიტალიზმი ბოლოს და ბოლოს ყველგან **ეროვნულ კაპიტალიზმს** ჰქმნისო“, ხაზს უსვობს ავტორი და ამის დასამტკიცებლათ იმოწმებს **პეტრე კაპოტკინს**, რომელმაც აღნიშნაო „თვითთოეული ერის ტენდენცია თავისი სამყოფი სიმდიდრე თვითონვე დამოუკიდებლად აწარმოვოს“ და მით „თანდათან“ ბოლო ეღება „ერთა შორის შრომის განაწილებასო“. ავტორი უფრო შორსაც მიდის და ამბობს: „გარდა ამისა, ეკონომიური მოვლენა წარმოუდგენელია გარეშე ეროვნულ მოწესრიგებისა. ყოველი კაპიტალიზმი ამ მხრით ეროვნულია, და მსოფლიო კაპიტალიზმი, მსოფლიო ბაზარიც ამ მხრით არ არსებობს, რადგანაც არ არის მსოფლიო მოწესრიგება კაპიტალიზმისა,—არც მსოფლიო წარმოებისა, არც ბრუნვისა და არც ხმარებისა.“ ავტორი იმოწმებს **კარლ ბიუხერსაც** და ამბობს: „ისევე განახლდა ახალის ძალით პროტექციონიზმი, დარჩა ხმარებაში ეროვნული ფული. აგრეთვე ეროვნულია და არა საერთაშორისო მუშათა კანონმდებლობა, დაზღვევა მუშათა, საბანკო პოლიტიკა და სხვ.“ (182—3).

ავტორი ჩვეულებრივ ერთმანეთში ურევს სწორსა და ყალბ აზრებს, და მით აყენებს ერთ უშველებელ კორიანტელს, რომელსაც ის ვერც თავსა და ვერც ბოლოს ართმევს. მსოფლიო კაპიტალიზმი, ავტორის აზ-

რით, არსებობს და თანაც არ არსებობს: იგი არსებობს, ვინაიდან მას ყველგან „იდენტიური“ მოვლენა გამოუწვევია; იგი არ არსებობს, ვინაიდან მას „მოწესრიგება“ აკლია. ძალიან კარგი, მაგრამ ავტორს ავიწყდება, რომ ეს ორი „ვინაიდან“ ორი **სხვადასხვა** ქუროს ღვინოა და მათი ერთმანეთში არევა ისეთ „ქიმიურ რეაქციას“ გამოიწვევს; რომ არა მგონი სხვა ვისმეს, გარდა ავტორისა, მისი დაღვევა მოსწყურდეს.

თავი დავანებოთ ავტორის „კადრილს“ არსებობა-არა არსებობის შესახებ, ეს მის განსაკუთრებულ ლოლიკის სფეროში შედის, — მე ვკითხავ მას მოწინებით, რატომ არ ინება მან აეხსნა მკითხველისათვის — რაშიმდგომარეობს **არა-იდენტიური** მოვლენები, რომელნიც, მისი აზრით, „ჰქმნიან ეროვნულ კაპიტალიზს“? მან თქვა და, შეიძლება, კიდევ ნანობს ახლა, რომ მსოფლიო კაპიტალიზში ყოველ ერში იდენტიურ მოვლენათ იწვევს; ახლა საჭიროა გამოირკვეს, როდის და როგორ ქცეულან ეს მოვლენანი არა-იდენტიურად. ან შეიძლება მისგან დასახელებული მაგალითები **სამაგალითოთ** მიუჩნევია მას?! ელემენტებია ის, რომელთაგან ინასკვება ეროვნული კაპიტალიზმი? ყოველი ერთი ცდილობს მისთვის საჭირო ნივთები თვითონვე შეჰქმნას, ყოველი ერთი უბრუნდება პროტექციონიზმს, ყოველი ერთი ჰქმნის საკუთარ მუშათა კანონმდებლობას და სხ., — ასე დარბაისლობს ჩვენი ავტორი, მაგრამ მას ერთხელაც არ მოსვლია თავში, რომ ყველა ამია ის ამტკიცებს მხოლოდ და მარტო იმას, რისი დარღვევა მას მოუწადინებია! მართლაც-და, ყველა ერთათვის იდენტიური გამხდარა წარმოება, ბრუნვა, ხმარება, კანონდება, პოლიტიკა... აქედან იდენტიური ყოფილან მათთვის ეს სოციალური მოვლენანიც, **ერგო** — მსოფლიო კაპიტალიზმი მოქორილი ზღაპარი არ ყო-



ფილა! მე ეს სულაც არ მითქვამს! — შემომიბღერს ავტორი — დიახ, არ გითქვამთ, მაგრამ თავი და თავი სწორეთ ისაა, რომ თქვენ ერთი გსურთ, ხოლო თქვენგან მოყვანილ ფაქტებს კი მეორე. თქვენთვის სავალდებულო იყო დაგემტკიცებინათ, რომ ერთი ერის კაპიტალიზმი არსებითათ სხვაა, ვინემ მეორე ერის, რომ კაპიტალისტური წარმოება-განაწილება, საბანკო სისტემა — პროტექციონიზმი, მუშათა კანონმდებლობა და ბევრი სხვა ყველა ერთთვის ერთსა და იმავე პოლიტიკა-ეკონომიურ პრინციპებზედ არ ემყარებიან. და სანამ ეს ძირითადი განსხვავება არ აღმოუჩენია ავტორს სხვა და სხვა, კაპიტალისტურ წესწყობილებით ცნობილ ერებ შორის, მანამ მისი ღალადი რაღაც განსაკუთრებულ და თვით-ეულ ერისთვის სრულიად ორგინალურ კაპიტალიზმზე ფუქია და უნაყოფო.

არის კითხვის მეორე მხარეც — ეს ის, რომ „ეკონომიური მოვლენა წარმოუდგენელია გარეშე ეროვნულ მოწესრიგებისაო“ (ხაზი ჩემია). ეს აღმოჩენა მარტოდენ ავტორის შორსმჭვრეტელობას უნდა მიეწეროს, ამა სხვას ვის მოუვიდოდა იგი თავში? მთელი მე-XIX-ე საუკუნის განმავლობაში სოციალისტ-კომუნისტთა ყველა ჯურის წარმომადგენელნი იმას გაიძახოდენ, რომ კაპიტალიზმს ყველგან და ყოველ ერში მოწესრიგება აკლია, რომ ის იწვევს არა-ნორმალურ წარმოებას და არა-ნორმალურ განაწილებას, რომ სრული ანარქია გაბატონებულია და საჭიროა ბოლო მოეღოს ამ უწყესრიგობას... და ახლა გამოდის აღაოოდიელთა ერთი „უმშვენიერესი“ ნაშეხი და ქვეყანას არწმუნებს „ეკონომიური მოვლენა ეროვნულათ მოწესრიგებულიაო“! აიღეთ თვით არა-სოციალისტური წრე: განა ფიზიოკრატნი თეორიულათ არ ამართლებდენ ამ თავ-აშვებულ

ანარქიას წარმოებისას და განაწილებისას? განა მერქანა
ტილისტნი არ ლამობდენ, მეორეს მხრით, იმავე ანარქიის რამდენათმე მაინც შეზღუდვას? მაგრამ რაღა გავა-
გრძელო, ყველა ჯურის ანარქიზმიც ხომ ამ სოციალ-
ეკონომიურ ანარქიის პირმშო შეილია, ხოლო ავტორს,
როგორცა სჩანს მის თხზულების წინასიტყვაობიდან, ანა-
რქიზმთან ძალიან ახლო ნათესაობა ჰქონია და აბა რათ
უნდა გვიკვირდეს ანარქია თვით მის აზროვნებაში! უა-
მისოთ ის უეკველათ მიხვდებოდა, რომ ეროვნული მო-
წესრიგება და ეროვნული კაპიტალიზმი ორი ერთმანე-
თის მოწინააღმდეგე პრინციპია. სოციალ-ეკონომიურ სფე-
რის მოწესრიგება უარყოფს კაპიტალიზმს და აწესებს მის
ანტიპოდს—სოციალიზმს. სწორეთ ამიტომ ებრძვიან მას,
მოწესრიგებას, ასე გააფთრებულათ ყველა ერთა მყვლე-
ფელნი კლასნი, და ასე გულადათ ექომაგებიან მას ყვე-
ლა ერთა გაყვლეფილნი კლასნი. ეგრ. წოდ. სოციალ-
ური კანონდება, რომელიც შემოაქვთ იმავე გაყვლე-
ფილ კლასთა დასაშოშმინებლათ, რა საკვირველია, არ
წარმოადგენს მოწესრიგებას, ის მხოლოთ წვეთია მოუ-
წესრიგებულობის ზღვაში, მეტი არაფერი. მაშასადამე,
არ არსებობს არც მსოფლიო და არც ეროვნული მო-
წესრიგება კაპიტალიზმისა და აქედან აბსურდია ასეთ
არგუმენტაციის მოშველება მსოფლიო თუ ეროვნულ კა-
პიტალიზმის არ სებობა-არარსებობის დასამტკიცებლათ.

თუ რამე მოწესრიგებაზე შეიძლება ეკონომიურ
სფერაში ლაპარაკი—ეს არის მოთხოვნა და მიწოდება
(Nachfrage und Angebot, спрос и предложение). კაპიტა-
ლიზმს ყველგან და ყოველთვის ახასიათებს დამზადება
საქონლისა და მისი თავისუფალი გაცვლა-გამოცვლა.
თავისუფალი მწარმოებელი ჰქმნის ამა თუ იმ საგანს
გახსახყიდლათ და არა თავისთვის მოსახმარათ, ამიტომ



მას მჭიდროდ დამოკიდებულება აქვს ბაზართან, სადაც იგი ხვდება მრავალ სხვა მწარმოებელთ, რომელთაც იგივე საქონელი გამოუფენიათ, რაც მან თვითონ დაამზადა. ასეთ პირობებში მთავარი მომწესრიგებელი ინსტანცია უეჭველათ მოთხოვნა-მიწოდება არის. თვითეული მწარმოებელი ცდილობს ვარაუდით მაინც გამოითვალოს, რამდენი საქონელი უნდა დაამზადოს მან თავის წილად განსაზღვრულ დროის განმავლობაში, რომ ხსენებულ საქონლის საერთო მოთხოვნა და მიწოდება დაახლოვებით თანაბარი დარჩეს. ახლა ხომ მრავალსაგან მრავალი სასტატისტიკო დაწესებულებანი და გამოცემები არსებობენ მხოლოდ მარტო იმ მიზნით, რომ სათითაოთ ყველა საქონელთა მოთხოვნა და მიწოდება შეუწონონ ერთმანეთს და მით მეცნიურულათ დამუშავებული ღირებულებები მიაწოდონ მწარმოებელთ.

ხოლო კაპიტალიზმმა არ იცის ეროვნული საქონელი. შეიძლება ითქვას, მაგ., ჩინეთის ჩაი, ოსმალეთის თამბაქო, კუბის სიგარი და სხ., და ეს მარტოდენ იმ აზრით, რომ ჩაი ჩინეთის პროდუქტია თამბაქო ოსმალეთისა და სხ. მაგრამ იმ წამს, რა წამსცა ეს პროდუქტნი გასაყიდათ გამოუტანიათ, რაიც მოასწავებს მათი საქონლათ ქცევას, ისინი უკვე კარგვენ ყოველგვარ ეროვნულ თუ გეოგრაფიულ ხასიათს და წარმოგვიდგებიან განსაზღვრულ შრომის, აქედან-განსაზღვრულ ღირებულების მატარებელ საგნებად, რომელთა შორის მხოლოდ რაოდენობითი განსხვავებაა და არა თვისებითი. მარტოა-და, ჩინეთის ჩაი, ოსმალეთის თამბაქო და კუბის სიგარი მარტო მათ სამშობლოში როდი სალდება, არამედ ქვეყნის ხუთივე ნაწილში, სხვა და სხვა ერში და სახელმწიფოში, თანაც ეს პროდუქტნი მარტო დასახელებულ სამ კუთხეში როდი მზადდებიან, არამედ სხვა-

განაც, მაშასადამე, სამივე საგნის წარმოება-გასაღება მჭიდროთ დაკავშირებული ვგრ. წოდებულ. მსოფ-ლიო ბაზართან. რასაკვირველია, არსებობს აგრეთვე ეროვნული, ან უკეთ-ადგილობრივი ბაზარიც: თვითეულ სახელმწიფოს, თვითოეულ პროვინციას, თვითოეულ მოზრდილ ქალაქსაც კი აქვს ვგრ. წოდ. ბირჟა, სადაც ათასგვარი საფინანსო სპეკულაცია მძვინვარებს და, სხვათა შორის, სადაც ხდება ბაზარში გამოსაფენად დამზადებულ საქონლის მთელ სერიათა, შეფასება, ან ჩვენებურათ—მაზანდის დაწესება. მაგრამ დიდი შუცლო-მა იქნებოდა გვეთქვა, რომ ესა და ეს ადგილობრივი ბირჟა სრულიად დამოუკიდებელია სხვა ბირჟებისაგანაო, პირიქით მათ შორის კავშირი იმდენათ მჭიდროა, რომ უამკავშიროთ წარმოუდგენლიც კია თვითეულ მათგანის არსებობა. და ეს ბირჟანი ექვემდებარებიან ცენტრმტო-ლველ (centripetal) ტენდენციას, ე. ი. მოზრდილ ბირჟას ფასებს უკარნახებს დიდი ბირჟა, დიდს — მთლათ დი-დი და ასე ბოლომდე. რას ნიშნავს ეს ბოლოს და ბო-ლოს? იმას, რომ ლარიბ სახელმწიფოს ბირჟას იჯაბნებს მდიდარ სახელმწიფოს ბირჟა და ყველას კი ბატონად უხდება მსოფლიო ბირჟა. სად იმყოფება ამ უკანისკენ-ლის რეზიდენცია? ეს კი ღროსა და ადგილზეა დამოკი-დებული. დღეს ესა და ეს სახელმწიფო გამხდარა მსო-ფლიო წარმოება-ვაჭრობის ცენტრად ანუ ბულაზად, ხვალ შეიძლება მეორე გახდეს, დღეს ინგლისი ბრძანე-ბლობს, ხვალ შეიძლება გერმანიამ წაართვას მას უპი-რატესობა და ასე დაუსრულებლივ. უფრო ხშირათ ასე-თაც ხდება, რომ ერთ რომელსამე საქონლის ბულაზა და აქედან მაზანდის დამკანონებლად ერთი მსოფლიო ქალაქი გამოდის, მაგ., ლონდონი, მეორე საქონლის კი — მეორე, მაგ., ნიუ-იორკი.. .

საქონელი ეძებს მყიდველს, ეს უკანასკნელი კი თუ
 გინდ ჯანდაბის იქითა მხრიდან მოვიდეს, მის
 თვის სულ ერთია ქართველი თუ რუსი, ფრანგი თუ ჩი-
 ნელი. ის წარმოადგენს ამა თუ იმ ღირებულებას, რომ-
 ლის ეკვივალენტი გამოისახვის ფულში, უკანასკნელი კი
 სულაც არაა ეროვნული, როგორც ეს ჩვენს ავტორს
 ჰგონია. თავი და თავი ის კი არ არის, რომ ამა თუ იმ
 ოქროს ან ვერცხლის ნაქერს ზედ საფრანგეთის მამალი
 ან კიდევ რომელსამე გვირგვინოსანის სახე აზის. გერ-
 მანიაში, მაგ., თვითოეულ ოქროსა და ვერცხლზედ
 გამოქრილია ხან იმპერატორი ვილჰელმი, ხან საქსონი-
 ის თუ ბავარიის მეფე, ხან ჰესენის თუ ვაიმარის დიდი
 ჰერცოგი, ხან კიდევ ჰანზას რომელსამე „რესპუბლიკის“
 ღერბი, — მაგრამ ეს კიდევ არ იძლევა საბაბს ვთქვათ:
 არსებობს პრუსიის, ვაიმარის ან კიდევ ჰამბურგის ეროვ-
 ნული ფული! ოქრო ან ვერცხლი პირველ ყოვლისა სა-
 ქონელია და ისიც ისეთი საქონელი, რომელსაც
 ყველაზედ ნაკლებ ატყვია რაიმე პატრიოტული „ელ-
 ფერი.“ სხვა საქონელს ვერც კი გაასაღებთ ყველგან და
 ყოველთვის, ფული კი თვით ჯოჯოხეთშიც კი პოუ-
 ლობს გასაყალს, როგორც ხალხური ანდაზა იტყვის ხო-
 ლმე. ხოლო დიდი გამჭრიახობა არ იქნებოდა გვეთქვა
 — ოქრო ფასობს არა მისი წონის მიხედვით, არამედ
 იმით, ბზიალობს თუ არა მის ზედა-პირზედ ვილჰელმის
 აწკვეტილი უღვაშები ან მამლის აბირბილებული ბოლო?!
 კარგი იქნებოდა ერთხელ მაინც შეიკვრედდეს ავტორი
 იმ ვეება, შავ და უფანჯრო დარბაზში, რომელიც ბიუ-
 შია გადაკიმული და სახელად ინგლისის ბანკს ატარებს:
 იქ დაინახავდა ის, თუ როგორ „უტიფრათ“ ეპურობიან
 ინგლისელნი გვირგვინოსანთა თავებს და სახელმწიფოთა

ღერბებს და სამაგიეროთ როგორის „მოწიწებით“ სწორდება
ნიან ისინი თვით ლითონს.

და განა მარტო ესა თუ ის ძვირფასი ლითონი ეწე-
ვა მსოფლიო ბრუნვაში ფულობას? არა, რა საკვირვე-
ლია, ამ მხრივ გაცილებით უფრო კარბობს ვგრ. წოდ.
აქცია-ობლიგაციები, ვექსილ-ჩეკები და სხ. ეს კი მო-
სწავებს იმას, რომ მთელი თანამედროვე წარმოება-ვაქ-
რობა, პირველ რიგზე, **კრედიტზედ** ემყარება, ხოლო
კრედიტმა არ იცის ეროვნული ზღუდენი. დღეს საანბანო
რამედ გამხდარა სრულიად გადამთიელ ერთა წევრებ შო-
რის სააღებ-მიცემო მკიდრო კავშირი. უფრო ხშირათ
არც არსებობს რაიმე პიროვნულ დამოკიდებულება სხვა
და სხვა ერთა წევრებ შორის, ამის მაგიერობას უბრალო
ქალაქი ეწევა, რომლის ძალით რუსი სოცდაგარი, მაგ.,
ახალზელანდიაში არსებულ მადნეულობათა სააქციონე-
რო საზოგადოების დივიდენდში მონაწილეობს. ყველა
ამ და ბევრი სხვა რთულ დამოკიდებულებათ ავტორმა
შეიძლება არც კი უწოდოს სოციალური მოვლენანი“?!
მაშ რაღაც ჯადოქარს და არა ამ მოვლენათ უნდა მიე-
წეროს, მაგ., ამას წინათ **ამერიკის** სარკინის-გზო კრიზი-
სის მეოხებით გამოწვეული დებრესია წარმოება-ვაქრო-
ბის სფერაში **ევროპის** სხვა და სხვა სახელმწიფოში! რაღა
შორს წავიდეთ: რუსეთში რეაქცია გააბატონა არა საფ-
რანგეთის გაფილისტებურმა rentier-მ, არამედ ილიოდო-
რის გალიუცინაციაში!

მისცეთ ჩვენს მსჯელობას კიდევ უფრო კონკრე-
ტიული გამოხატულება. წარმოიდგინეთ, ერთ მშვენიერ
დღეს ინგლისთან შესწყვიტა ყოველგვარი კავშირი მსო-
ფლიოს ყველა ერებმა და სახელმწიფოებმა, ერთი ნემ-
სის ყურწის ოდენა არაფერი შეაქვთ იქ და არც არაფერი
გააქვთ იქიდან, — რა შედეგს მივიღებთ? თავზარდამცემს



ინგლისელთა მთელ ერისათვის: დამზადებულ საქონელთა უშველებელი ზვინები კუნძულს ვერ განშორდებოდა, ნედლი მასალა გარედან არ შემოვიდოდა, არ შემოვიდოდა ხორბლეულობა და ბევრი სხვა სანოვავეც; შეჭრდებოდა მუშაობა ფაბრიკა-ქარხნებში აღიკვეთებოდა აღებ-მიცემობა, არ შემოვიდოდა მილიარდები სარგებლის სახით მთელს დუნიაზედ გაბანდულ კაპიტალისტებიდან, ინგლისის ბანკი თავის ოპერაციებს შეაჩერებდა, ჟანგი მოეკიდებოდა სავაჭრო ფლოტს, გაჩნდებოდა საშინელი უმუშევრობა და შიმშილი, დაემხობოდა სამხედრო ძლიერება... ერთი სიტყვით, დღევანდელ ბრწყინვალე და ამავე ალბიონს იგივე მოუვიდოდა, რაც ერთხელ რომის იმპერიას მოუვიდა, მხოლოდ იმ განსხვავებით, რომ პირველი უომრათ გაქარწყლდებოდა, მაშინ როდესაც მეორემ ბარბაროსებთან უთანასწორო ომებში დალია სული. განა სხვა ერებს კი კარგი დღე დაადგებოდა? ინგლისთან ყველა ძაფების გაწყვეტა დიდ აღიაქოთს გამოიწვევდა ყველა იმ ურებში და სახელმწიფოებში, რომელთაც წინეთ კავშირი ქონდათ მასთან, — აბა რომელი იქნებოდა ისეთი, რომ ეს კავშირი არ ქონოდა და სწორეთ ამ უფართოეს და ურთულეს დამოკიდებულებათა ერთბაშათ მოშლა-მოსპობა განუზომელ და ჯერ კიდევ უნახავ შედეგებს გამოიწვევდა ყველგან, სამრეწველო და საფინანსო დაწესებულებათა გაკოტრება ყველგან გადამდებ სენივით იმძვინვარებდა, მრეწველობა-მეურნეობის სფერა ძალზე შეიკუმშებოდა ყველგან, რასაც შესაფერი უმუშევრობაც ზედ მოჰყვებოდა.... რასაკვირველია, სხვა სახელმწიფონი და ერნი ისე არ დაემხობოდნენ, როგორც ეს განმარტოვებულ ინგლისს მოუვიდოდა — ამ უკანასკნელის მეტოქე სახელმწიფოთა სხვა და სხვა დარგის წარმომადგენელნი კიდევ მოიგე-

ბდენ, — მაგრამ **საერთო** ათ წელსაც ვერ გამობრუნდებოდნენ ისინი აწერილ კატაკლიზმის ცუდ და გამანადგურებელ ზიანისაგან.

ახლა დაუშვით, აგრეთვე ჰიპოტეტიურათ, რომ თვითეული ერთი თუ სახელმწიფო იმავე ტაფაზე იწვის, რა ტაფაზედაც ინგლისი იწოდა, ჩატყდა ხიდი მათ შორის და მოისპო ყოველივე მიმოსვლა, — რა შედეგს მივიღებდით? სრულიად არაფერსაც! — უდარდელათ მოგვიგებს ავტორი, ის დიდ ბედნიერებათაც კი ჩათვლიდა, პირიქით, ჩარხის ასე დატრიალებას. პეტრე კროპოტკინი და კარლ ბიუხერი სწორედ ასეთ იმედს უწერდნენ მას გულში. ერთა შორის შრომის განაწილება თანდათან ადგილს უთმობს ისეთ ტენდენციას, რომ თვითეული ერთი ცდილობს ყოველივე მისთვის საჭირო საგანი თვითონვე, სხვა ერის დამოუკიდებლათ შექმნას — ასე მსჯელობს ავტორი.

მზგავს გულუბრყვილობას იშვიათათ თუ წააწყდება ადამიანის მართალია, ამა თუ იმ ერს ყოველთვის თან სდევს სურვილი ეკონომიურათ დამოუკიდებელი გახდეს, რადგან ასეთი ვითარება თავდება აგრეთვე მის პოლიტიკურ დამოუკიდებლობისა, მაგრამ ჯერ კიდევ არავინ გამოსულა ისეთი გულუბრყვილო ეთქვა: ხსენებულ დამოუკიდებლობის უებარი წამალი სხვა ერებთან ყოველგვარ ეკონომიურ კავშირის მოსპობა არისო! მართლაცდა, ბ. Baton-ის ლოლიკას რომ ბოლომდე ჩავყვეთ, გამოვა, რომ რომელიმე სერბია ინგლისზე წინა დგას ეროვნულ-ეკონომიურათ! სერბია ინგლისთან შედარებით **ღიახაც თვითონ ამზადებს თავის საყოფ** გამოსაკვებს, ტანისამოსს (გაიხსენეთ სოფლური ქსოვილები მატყლისაგან, ბამბისაგან, სელისაგან! ტყავის ქალამანსაც ნუ დაივიწყებთ!) და სხ. აქედან, სერბია უეჭველათ უფრო



ადვილათ აიტანს მსოფლიოდან სრულიად გამოთიშვას, ვინემ ინგლისი, — მაშ პირველი უფრო დაწინაურებული ყოფილა, ვინემ მეორე! ჩვენ კი გვეგონა, კოდვილთ, რომ ინგლისი უმაღლესათ დამოუკიდებელია ეკონომიურათ, იგი ბევრ სხვა ერებსაც გაბატონებია ამ მხრივ და ყველა ეს მიუხედავათ იმისა, რომ მას ერთ დღესაც არ შეუძლია დანარჩენ ქვეყნებთან უმიმოსვლოთ გასტანოს.

ერი, რაც უფრო განვითარებულია ის კაპიტალისტურათ, მით უფრო მჭიდრო და რთულია მისი დამოკიდებულება სხვა ერებთან; მისგან გატანილ და შემოტანილ საქონელთა რაოდენობა შეუჩერებლათ მატულობს წლითი-წლობით, არა თუ კლებულობს. ავტორი კი გვეუბნება კროპოტკინის პირით: „ამიტომაც კლებულობს თანდათან ყველგან სხვა ქვეყნებიდან შემოტანილი საქონელი.“ (182, ხაზი ჩემია). ჯერ ერთი, თუ შემოტანილ საქონლის რაოდენობა ყველგან კლებულობს, ამით გატანილ საქონლის რაოდენობაც უთუოთ ყველგან უნდა კლებულობდეს, წინააღმდეგის დაშვება დიდი სიბეცე იქნებოდა. ეს აუცილებელი დასკვნა ავტორს თითქო დაუფიწყნია, ნამდვილათ კი ის ალბათ განზრახ სჩადის ამას. მიზეზი ისაა, რომ ის ვერ დასახელებს ვერც ერთ მაგალითს, რომ კაპიტალისტურათ დაწინაურებულ ერის საქონლის ტრიალს უცხოეთთან დაეწიოს, და თუ ოდესმე რაიმე არაჩვეულებრივ მიზეზის გამო ასეთ მოვლენას დროებით მაინც ქონებია ალაგი, ეს მას, ერს, მისთვის სასურველ და სახეირო რამედ დაესახოს. პირიქით, ყოველ ერის წლიური ანგარიშებილიდის პაფოსით აღნიშნავს აღებ-მიცემობის გადიდება-გაფართოებას უცხოეთთანეს საუკეთესო მაჩვენებელია მის ეკონომიურ და აქედან პოლიტიკურ ძლევა-მოსილებისა.

შეიძლება ავტორს იმის აღნიშნვა უნდოდა, რომ ყოველი ერთ მართლაც ცდილობს რაც შეიძლება მეტი საქონელი გაიტანოს შიგნიდან და სამაგიეროდ რაც შეიძლება ნაკლები საქონელი შემოიტანოს გარედან. ახლა ამას დავაკვირდეთ. ერთი, სანამ ის საკმაოდ არაა განვითარებული მართლაც ვერ ახერხებს გატანილ საქონლის რაოდენობა შემოტანილისას აღემატებოდეს, ამიტომ მთელი მისი ენერჯია მიმართულია იქითკენ, რამე ფერათ ბალანსი ანუ თანასწორობა დაამყაროს ორსავე კათეგორიის საქონლის რაოდენობათა შორის; შემდეგი ნაბიჯი კი ისაა, რომ ის ახლა ცდილობს ეს ბალანსი ისევ დაარღვიოს გატანილ საქონლის სასარგებლოდ. თავი და თავი ეს მეორე ხანაა, ის მოასწავებს კაპიტალიზმის უმაღლეს განვითარებას რომელსამე ერში. როცა გატანილ საქონლის რაოდენობა სჭარბობს შემოტანილისას, ეს, რა საკვირველია, არ ნიშნავს იმას, თითქო ზედმეტი საქონელი მუქთათ ურიგდებოდეს უცხოელებს, — არა, ამ შემთხვევაში ზედმეტ საქონლის ღირებულება ფულის სახით ბრუნდება უკან, ხოლო ეს თავისუფალი ფული მის მეპატრონეთ შეუძლიან ადგილობრივი წარმოების გაფართოებას მოახმარონ, ან კიდევ უცხოეთში გაბანდონ ამა თუ იმ მომგებიან საქმეებში. ასეთ მდგომარეობაში დღეს, მაგ., ინგლისი იმყოფება, მერე რა მტკიცდება ყველა ამით? მხოლოდ და მარტო ის, რასაც ზევით ვამბობდი: ერთა შორის ეკონომიური კავშირი კიდევ უფრო ძლიერდება, არა თუ სუსტდება. ინგლისს გააქვს ზედმეტი საქონელი და ამ გზით მიღებული ზედმეტი ფულიც უმეტეს შემთხვევაში უცხო ერთა წარმოების აღორძინებას ხმარდება. მაგრამ არც ეს პრივილეგიური მდგომარეობა არის მუდმივი და შეურყეველი, ინგლისის კვალს მიზღვევენ სხვა ერებიც, ასე რომ

გატანილ და შემოტანილ საქონლის რაოდენობა ჩვეულებრივ ძველ კალაპოტს უბრუნდება თვითეულ ერში, ე. ი. ორსავე ჯურის საქონელი თანდათან უთანასწორდება ერთმანეთს. მაგრამ ეს კითხვა სულ სხვაა და მეც არ გამოვუდგები მას.

ამ რიგით, ჩვენი ავტორის ვითომდა მეცნიერული პროგნოზი ერის პროგრესიულ მსვლელობის ყირამაღაზედ დაყენებას მოასწავებს, მეტს არაფერს. ან თუ გნებავთ, ის განსვენებულ პუბლიცისტ მიხალოვსკის სოციალოგიურ თეორიის მიმდევარია ცხოვრებაში. სწორეთ მიხაილოვსკი ამტკიცებდა ინდივიდთა შორის შრომის განაწილების მანებლობას და მთელის ენერჯით ექმნებოდა ისეთ წვრილ-ბურჟუაზიულ ვითარებას, როცა თვითეული ინდივიდი თანაბრათ დახელოვნებულია ყოველ დარგში, — ამას თვლიდა ის ნამდვილ პროგრესათ. ბ. Bâton-საც ერი ინდივიდის სახითა აქვს წარმოდგენილი და ამიტომ მისი იდეალი იმაში მდგომარეობს, რომ ერი თვითონვე გახდეს ყველაფრის შემქნელი და აქედან დანარჩენ ერებიდან ეკონომიურათ სრულიად გამოთიშულ-განცალკევებული, — ესეც მისი „ორგინალური“ თეორია პროგრესზე!

ჩვენ დავინახეთ, ერის ასეთი „დამოუკიდებლობა“ მტკნარი უტოპიაა. დააკვირდით თუ გინდ ავტორის პოზიციას პროტექციონიზმის მიმართ, — ის თითქო თავს იმით ინუგეშებს, რომ ამ საშვალეებით ყოველ ერს შეუძლია თავის დამოუკიდებლობა დაიცვას და განამტკიცოს. ჯერ ერთი, პროტექციონიზმი კაპიტალისტურათ ხუსტი ერის ხელოვნური საშვალეებაა და ისიც ძლიერ პრობლემატიული ანუ საექვო; კაპიტალისტურათ ძლიერ ერს იგი არ ექივრება, პირიქით, ის ბორკავს და აფერხებს მის ძლიერამოსილ სრბოლას. ჩვენს ავტორს კი ეს სის-

ტემა, როგორც ეტყობა, მოწინავე ერის კიდევ უფრო დაწინაურების ნამდვილ ბერ-კეტად მიუჩნევია! შეიძლება მან მიმითითოს იმაზე, რომ თითქმის ყველა ერნი იმარჯვებენ ამ სისტემას და ამიტომ საბაჟო კედლები ყველგან ჩვეულებრივი მოვლენაა, მაგრამ ამ მითითებით ის მხოლოდ თავის „პროგრესისტობას“ დაამტკიცებს. ვინ არ იცის, რომ ეს კარ-ჩაკეტილობა ყველგან, განსაკუთრებით—დაწინაურებულ ქვეყნებში ნამდვილ ღვთისრისხვად არის მიჩნეული როგორც მშრომელთათვის, ისე მომხმარებელთათვის? ან იქნება, მაგ., უმაღლესათ აღორძინებულ გერმანიას დიდ სიკეთეს უშვრება შვედურჯი ბლოკი იუნკერთა და ცენტრისა თავის პროტექციონიზმით? მაშ უსამართლოთ ეძახიან მათ ხალხის სისხლის მწოველებს და მეფახშეებს (Blutsauger und Brotwucherer)?

მეორეს მხრით, ერის მისწრაფება დამოუკიდებლობისადმი შეიძლება იმაში გამოიხატება, ავტორის აზრით, რომ, მაგ., ინგლისის გაბატონებულნი კლასნი დიდ ცდაში არიან ამ უკანასკნელათ წვრილი მესაკუთრე გლეხობა (small landholders) ძალზე გაამრავლონ სოფელში. ისინიც ხომ იმით ასაბუთებენ თავიანთ მოქმედებას, რომ ეს ახალი კლასი წვრილ გლეხობისა თვალსაჩინოთ ასწევს ხორბლეულობის მოსავალს ინგლისში და მით უკანასკნელი დამოუკიდებელი გახდება მიწადამოკმედ ქვეყნებისაგანო?! ნამდვილათ კი ცხადზე უცხადესია, რომ ინგლისის ბატონ-პატრონნი დიდათ უფრთხიან უმიწაწყლო პროლეტარიატის სიმრავლეს და მოყვანილ საშვალეებით მხოლოდ-ღა მის გათხელებას ლამობენ.

რა საკვირველია, ყოველი ერი ცდილობს უმწვერვალესათ განავითაროს თავისი ბუნებრივი და სოციალური ძალები; ის ხშირათ ხელს კიდებს ისეთ საქონლის



დამზადებას, რომელსაც გუშინ, შეიძლება, კიდევ ვერაფერი უბოდა, სამაგიეროთ ის ხელს იღებს, აგრეთვე ხშირათ, ამა თუ იმ საქონლის დამზადებაზე. ყველაფერი, მზგავს შემთხვევებში, დამოკიდებულია ცივ და უღმობელ პირობებზე და არა ერის ან ცალკე მწარმოებელის „კეთილ სურვილებზე“.

ძალიან ხშირათ თვით ბუნება სდებს საზღვრებს, რომელთა გადალახვა საზოგადოების თუ ცალკე ინდივიდის ძალას აღემატება. ცივ-ჰაეიან ქვეყნებში თქვენ ვერ მოიყვანთ, რაც უნდა ეცადოთ, მრავლისაგან მრავალ სათუთ მცენარეულობათ, როგორნიც არიან: ვაზი, მთელი რიგი ხილებისა და ყვავილებისა, ყავა, ჩაი, თამბაქო, თუთის ხე და სხ. ცხელ ქვეყნებში სამაგიეროთ თქვენ არ ხედებით დაბურულ ტყეებს, გრძელ-ბეწვიან ნადირთ, თევზით მდიდარ მდინარეთ და სხ. ერთი ქვეყნის ტრიალი მინდვრები კარგია სახნაე-სათესათ, მაგრამ იქ მადნეულობა ძვირობს; მთა-გორიან ქვეყანაში კი შეიძლება ეს უკანასკნელი ძალიან ბლომათ იყოს, მაგრამ ხორბლეულობა ცოტა ან სულ არ მოდიოდეს იქ...

ხოლო რაც შეეხება სოციალ-ეკონომიურ პირობებს, ამ მხრივ სახეში მისაღებია: ტენიკის განვითარების ესა თუ ის ხარისხი, ნედლ მასალის და სანოვაგის სიძვირესიაფე, შრომის ხელ-ფასი, ორგანიზატორული ძალა კაპიტალისთა, ერთის მხრით, და მუშათა, მეორეს მხრით, სოციალურ კანონდების ხასიათი, თავისუფალ თანხათა სიდიდე-სიპატარაეე, ბაზრის სიშორე-სიახლოეე, პოლიტიკურ წყობილების ესა თუ ის წესი და სხ. აქ ჩამოთვლილი პირობები, საერთოთ თუ ცალკე აღებულნი, ძალიან ხშირათ გადამწყვეტნი არიან, რომელ ქვეყანამ რა და რა საგნების დამუშაეებას უნდა მიჰყოს ხელი. თითქმის ყოველ ნაბიჯზედ ვხედებით ისეთ მაგალითს, როცა

კაპიტალისტი ხელსაყრელათ არა თვლის მის ქვეყანაში გაჩერებას და მთელი თავისი წარმოება უცხოეთში გადააქვს; მეორეს მხრით, მუშებიც გაურბიან ხშირათ სამშობლოს და ცხრა მთის იქით იხვეწებიან. ისიც კია, დღევანდელ ვეება ბანკების მეოხებით კაპიტალისტს არც კი სჭირდება ხშირათ სხვაგან გადახვეწა, მისი თავისუფალი თანხა გზას იკვლევს მსოფლიოს ყოველ კუთხეში, ასე რომ მან არც კი უწყის, სად და რას სჩადის მისი თანხა, თეთრ-წითელ-შავ-ყვითელ კანიან მუშების ზურგზედ აძრობილ ზედმეტ ღირებულების, სარგებლის სახით, ბანკი აძლევს მას...

მაშასადამე, ერთა შორის შრომის განაწილება თანამედროვე კაპიტალისტურ წესწყობილების უადრესი და უძლიერესი მხარეა, ის არ ჰქრება და არც სუსტდება, როგორც ეს ჩვენს ავტორს მოუხსურებია, არამედ კიდევ უფრო რთულდება და მტკიცდება. ამ ძლევამოსილ საეპოქო პროცესის წინაშე პროტექციონიზმი და სხვა რამე მხოლოდ-და პალიატივაა, რომელსაც ხშირათ იმარჯვებენ ამა თუ იმ ერის გაბატონებული კლასები თავიანთ გაუმძღარ მადის დასაკმაყოფილებლათ და არა რაღაც პატრიოტიზმის ხათრით. ნამდვილი კულტუროსნობა იმაში კი არ მდგომარეობს, რომ ამა თუ იმ ერმა ყველა მისთვის აუცილებელი ნივთები, გინდა არ გინდა, უთუოთ . თვითონ აწარმოოს“, არამედ იმაში, რომ რაც შეიძლება ნაკლებ შრომით რაც შეიძლება მეტი ღირებულება შექმნას მან, ერმა. ეს კი მოასწავებს იმას, რომ ყოველი ერთი ქმნის ისეთ ნივთებს, რომლებიც რაც უფრო ეგუება ადგილობრივ ბუნებას და სოციალ-ეკონომიურ ვითარებას, მას გააქვს ზედმეტი რაოდენობა ამ ნივთებისა გარეთ და სამაგიეროთ შემოაქვს მისთვის საჭირო სხვა ნივთები—აი, უმარტივესი ფორმა შრომის განაწილებისა.



ცოტა არ იყოს, სიტყვა გამიგრძელდა, მაგრამ მძინარეობა და, მკითხველი დამეთანხმება, რომ თვით საგანი მსჯელობისა ღირს ამაღ. კაპიტალისტურმა წესწყობილებამ წარმოშვა საზოგადოებრივ ცხოვრების ისეთი ვითარება, რომლის მზგავსი არ იცოდა გასულმა საუკუნოებმა. იგი, წესყობილება, ემყარება, ერთის მხრით, საწარმოო ძალთა კერძო საკუთრებაზედ, ხოლო მეორეს მხრით — თვით წარმოების განსაზოგადოებრიობაზედ. შრომის განაწილების და ტენიკის უმწვერვალესი განვითარება შესაძლებლად ხდის მრავალ ადამიანთა საერთო და ჰარმონიულ თანამშრომლობას, რომელიც თავის მხრივ ჰბადებს აუარებელ სიმდიდრეს, აგრეთვე ყველა იმ გასაშტერებელ სასწაულთ, რომელთა მოწმე ჩვენა ვართ; მაგრამ სწორეთ იმავე დროს ამ განსაზოგადოებრივებულ შრომის ნაყოფით მხოლოდ-და უმცირესობა სარგებლობს საესებით, დიდი უმრავლესობა კი, რომელმაც შეჰქმნა მთელი ეს სიმდიდრე — კომფორტი, იძულებულია მარტოდენ ნასუფრალს დასჯერდეს. მშრომელის და საწარმოო ძალთა ერთმანეთისაგან გათიშვა — აი ის სათავე, საიდანაც ყოველივე უსამართლობა და ბოროტება გამომდინარეობს.

და აი ყველა ეს კულტურა და უკულტურობა, ადამიანის ძლევა მოსილება და იმავე ადამიანის დაბეჩავება ახსიათებს არა მარტო ერთ ერს, არამედ ყველა იმ ერებს, რომელთა წიაღში კაპიტალიზმს თავისი მძლავრი ფესვები გაუდგამს. აქედან ერთფეროვნება საზოგადოებრივ ცხოვრებისა ყველა, კაპიტალისტურათ დაწინაურებულ ერებში ჰირდაჰირ განმაცვიფრებელ ხარისხს აღწევს. ყველგან თქვენს ყურადღებას იპყრობს არსებითათ ერთგვარი „ეკონომიკა“ და აქედან წარმოშობილი ერთგვარი „ზედნაშენი“. მიემართოთ ფაქტებს.

კერძო საკუთრება და ადამიანის (იურიდიულათ)

პირადი თავისუფლება ყოველ კაპიტალისტურ ერის ქვე-
კუთხედს წარმოადგენს, სწორეთ ამ ქვეკუთხედზედ ემ-
ყარება მისი სამოქალაქო უფლებაც ანუ სამართალი.
ცნობილია, ევროპიელებმა ძველ რომაელებს დაესესხენ,
როგორც ზოგად პრინციპებს უფლებაზე. ისე მრავალ
კანონებს, რომელნიც მათ შეუფარდეს საკუთარ სოციალ-
ეკონომიურ განწყობილებათ. ეს კი შესაძლებელი იყო
იმდენათ, რამდენათ ესა თუ ის ერი ფეხსა დგამდა ახალ
კაპიტალისტურ ცხოვრებაში. ამიტომაა კიდევ, რომ სა-
მოქალაქო უფლება—პროცესი, საზოგადოთ მთელი სა-
მართალი ყველა კაპიტალისტურ ერებში არსებითათ
ერთი და იგივეა. ამას ვერ უარყოფს ვერც ერთი თვალ-
ხილული. დღეს ყველამ უწყის, მაგ., რომ ეგ. წოდ.
დიდ ნაპოლეონის კოდექსი, ეს უშესანიშნავესი ნაშთი
საფრანგეთის დიდ რევოლიუციისა, სანიმუშოდ გახდა
შემდეგში ყველა გვიან წამოჭრილ ერთათვის.

ახლა ავიღოთ პოლიტიკა. პირველ ყოვლისა პრინ-
ციპი სახელმწიფოებრივობისა არსებითათ ყველგან ერთ-
გვარად ესმით და აქედან ამ პრინციპის ცხოვრებაში გან-
სახვა ყველგან ერთგვარათ ხდება. თვითეული კაპიტა-
ლისტური ერი აწესებს თავისთვის წარმომადგენლობითს
მართვა-გამგეობას, რომელიც იმავ დროსვე სამ—პირო-
ვანია: კანონმდებლობა, აღსრულება და მართლმსაჯუ-
ლება. მართალია, ამ სამ ფუნქციის ურთიერთი განწყო-
ბილება ყველგან და ყოველ ერში ერთგვარი არაა, მა-
გრამ ამით ის-ღა მტკიცდება, რომ ერთი ერი მეტათ გან-
ვითარებულა, ხოლო მეორე—ნაკლებ, ან კიდევ ერთის
ერის ბურჟუაზია ადრე გამოსულა საზოგადო ასპარეზზე,
ხოლო მეორის—გვიან. ვინ არ იცის, რა დიდი გავლენა
იქონია ინგლისის პოლიტიკურმა წყობილებამ საფრან-
გეთის ეგ, წოდ. განმანათლებლებზე, მათ შორის მონ-



ტესკიო ჰქმნის ახალ, ბურჟუაზიულ სახელმწიფოებრივობის შესანიშნავ მწყობრ თეორიას, რომელიც ნამდვილ კატეხიზმოდ იქცა კონტინენტის ყველა ერთათვის ახალ სახელმწიფო მართვა-გამგეობის დასაფუძნებლათ.

მაგრამ სახელმწიფო ხომ ბატონობის იარაღად გამხდარა დღეს თვითვეულ ერში. უკანასკნელი გახლენილია ორ უმთავრეს ბანაკად, რომელთა შორის ხდება მალულათ თუ ცხადათ, შეგნებულათ თუ შეუგნებლათ სამკვდრო-სასიცოცხლო ომი, — ესაა **კლასობრივი ბრძოლა**, რომელიც ღერძია თვით საზოგადოებრივი ცხოვრებისა. მეტია იმაზე ლაპარაკი, რომ ამ შრიც სრული ანალოგია არსებობს თანამედროვე, კაპიტალისტურათ განვითარებულ ერთა შორის. აქ ებრძვის ერთმანეთს ორი დიდი და საეპოქო პრინციპი: ერთი ებლაუქება **აწმყოს**, მეორე იცქირება **მომავლისაკენ**, ერთი კონსერვატიულია, ხოლო მეორე რევოლიუციონური.

თანახმად ამისა მიზანი და საშვალემა, რომელთაც ისახავს და ანხორციელებს თვითვეული ეს ერთმანეთთან შეურთებელი კლასი, არსებითათ **ერთი და იგივეა** სხვა და სხვა ერში, მშრომელი მასსა ყველგან ერთგვართ მისწრაფვის დაარსოს პოლიტიკური, პროფესიული და კოოპერატიული ორგანიზაციები და მით ენერგიულათ დაიცვას თვითვეული მისი წევრი, როგორც მოქალაქე, როგორც მუშა და როგორც მომხმარებელი. არც მოპირდაპირე კლასსა სძინავს, თავის თავათ მისახვედრია, ის იღებს ამა თუ იმ ზომას თავის პრივილეგიურ მდგომარეობის განსამტკიცებლათ, სახელმწიფოს ორგანოები მის ინტერესების მუდმივი და ერთგული დარაჯია ამისათვის. რაც შეეხება მუშათა კანონმდებლობას, ეს ისეთი დარგია, რომელიც ანალოგიურათ წარმოებს ყველგან. როცა, მაგ., ინგლისის სამინისტრო აგზავნის თა-

ვის მოხელეს გერმანიაში მუშათა სამ-მაგ დაზღვევის სასწავლოთ, ამით მხოლოდ ის მტკიცდება, რომ ერთი სახელმწიფო ბაძავს მეორეს ამა თუ იმ სოციალურ ზომის დაკანონებაში.

თვით სულის-კვეთება კლასთა, მათი ზნე და ხასიათი, იდეოლოგია და პრაქტიკული გამოხვედრები საკვირველოთ წააგავენ ერთმანეთს სხვა და სხვა ერში. ამის მიზეზი მზგავსი სოციალ-ეკონომიური ვითარება არის. დღეს უკვე მწერლობაშიც ხშირათ გვესმის სიტყვები: პროლეტარი, კაპიტალისტი, წვრილი ბურჟუა და სხ. თვითეულ ამ სიტყვის გაგონებაზე ჩვენ ნათლათ წარმოგვიდგება გონებაში ადამიანი განსაკუთრებულ ტიპისა როგორც ობიექტიურ მდგომარეობით, ისე ფსიხიკით, და ეს — მიუხედავათ მის ეროვნებისა. საილიუსტრაციოთ საკმარისია გავიხსენოთ თუ გინდ ისეთი ტერმინები, როგორცაა: კონსერვატიზმი, ლიბერალიზმი, რადიკალიზმი-ანტისემიტისმი — ანარქისმი, სოციალ-დემოკრატიზმი. თვითეული ეს „იზმი“ ერთგვარ შინაარსს გულისხმობს ყველგან, ვინაიდან ყოველ ერში არის მეტ-ნაკლებობით მსხვილი მიწათმფლობელი კლასი — ეს ბუდე კონსერვატიზმისა, მსხვილი და საშვალაი ბურჟუაზია — აკვანი ლიბერალიზმისა, წვრილი ბურჟუაზია, საიდანაც იჩეკებიან სხვა და სხვა ჯურის enfants terribles: რადიკალნი, ანტი-სემიტნი, ანარქისტნი დარჩა მუშათა კლასი — ჩონჩხი სოციალ-დემოკრატიზმისა...

აი, ერთფეროვნება მდგომარეობისა და სულიერ მიღრეკილებისა, თეორია და პრაქტიკისა ჰქმნის იმ ნიჲდაგს, რომელზედაც აღმოცენდება საერთაშორისო სამართალი. ამ უკანასკნელის მეოხებით უზრუნველყოფილია ყველგან კერძო საკუთრება და პიროვნების ხელშეუხებლობა განურჩევლათ ეროვნებისა და ქვეშემრდო-



მოზისა. რას ნიშნავს ეს? იმას, რომ უზრუნველყოფილია, ყველგან თავისუფლება მიმოსვლისა და საქმიანობისა; იმას, რომ, ნაგ., საფრანგეთის სამსაჯულოს განჩინება შეიძლება ინგლისში მოიყვანოთ სისრულეში, თუ წაგებული მხარე აქ გადმოსულა საცხოვრებლათ; ან კიდევ გერმანელს დიასაც შეუძლია, განსაკუთრებულ შემთხვევაში მიმართოს იტალიის სამსაჯულოს და იქ განახორციელოს თავისი უფლება... ასე რომ ახლანდელ დროში ადამიანი მაშინაც კი ვერ გაექცევა რაიმე სამოქალაქო ვალდებულებას ან კრიმინალურ დანაშაულს, როცა ის გადახვეწილა უცხოეთში, — მას აქაც თანა სდევს აღმასრულებელი ფურცელი ან პოლიცია. არის ერთი გამონაკლისი — პოლიტიკური დანაშაული, მაგრამ ისიც არა ყველგან და არა თანაბარის მიუდგომლობით.

უეჭველია, საერთაშორისო სამართალი არაა ისეთი და მტკიცე, როგორც ამა თუ იმ სახელმწიფოს სამართალი, მას აკლია განსაზღვრულობა და საკუთარი ორგანოები. არა სჩანს კანონმდებელი, არც აღმასრულებელი. ვინაიდან თვითეული სახელმწიფო მის საკუთარ კანონების თანახმად სჯის და გადასჭრის უცხოელის საქმეს, ამიტომ გარეშე მაყურებელი ხშირათ ვერც კი ამჩნევს საერთა შორისო სიმატლას არსებობას. მაგრამ საკმარისია ცოტა ახლო დაუკვირდეთ საგანს, რომ ეს ბურუსი გაიფანტოს, საერთა შორისო სამართლის თავი და თავი დამახასიათებელი მხარე იმაში მდგომარეობს, რომ თვითეული უცხოელი აღჭურვილია უფლებით დაიცვას თავისი ინტერესები სამშობლოს გადაღმაც და ამისათვის დაიხმაროს იქაური საჯარო დაწესებულებანი. ხოლო რაც შეეხება ამა თუ იმ სახელმწიფოს შინაგან სამართალს და პროცესს, არც ამ მხრივ არსებობს რაიმე დიდი სიძნელე, ვინაიდან, როგორც უკვე დავინახეთ ზე-

ვით, ისინი ყველგან ერთსა და იმავე პრინციპებზედ ემყარებიან, ამიტომ ადვილათ ვგუება მათ უცხოელი.

რომელია ის უმაღლესი ინსტანცია, რომელიც აკანონებს საერთაშორისო სამართალს? არ არსებობს საერთაშორისო პარლამენტი, ეს სრული სიძარტლეა, მაგრამ ამით კიდევ არ მტკიცდება თითქო ასეთი ინსტანცია მართლოდენ ფანტაზიის ნაყოფი იყოს. მე არას ვამბობ სხვა და სხვა სეპარატიულ ხელშეკრულებებზე, რომელთაც სდებს ერთი სახელმწიფო მეორესთან და მით განსაზღვრავს ადამიანის უფლება-მოვალეობას ორსავეს ტერიტორიაზედ. გაიხსენეთ ეგ. წოდ. საერთაშორისო კონგრესები თუ კონფერენციები, რომელნიც იკრიბებიან პერიოდულათ და პარლამენტისებურათ აკანონებენ არა მარტო სახელმწიფოთა-შორისო განწყობილებათ, არამედ აგრეთვე ადამიანთაშორისო ათასგვარ დამოკიდებულებათ **ბანუჩევლათ ქვეშემრდომობისა**. მართალია, ამ კონგრეს-კონფერენციების დადგენილებანი მხოლოდ მაშინ შედიან ძალაში, როცა მათ ხელს მოაწერს ამა თუ იმ სახელმწიფოს მთავრობა; ასეთი ფედერატიული წესი ხომ ცალკე სახელმწიფოშიც ხშირათ არსებობს, მაგრამ ამ მიზეზით განა ვინ უარყოფს რომელსამე დადგენილების ძალასა და მნიშვნელობას.

ამ უკანასკნელათ არსებობს უკვე საერთაშორისო მუდმივ დაწესებულების ნასახიცი—ჰააგის საერთაშორისო ტრიბუნალი. ამის გარდა, ვის არ სმენია ერთი ფრიად გავრცელებული აზრი, რომლის მიმდევარნი ქადაგებენ სხვა და სხვა სახელმწიფოთა საბაჟო პალოების წაქცევას და შუაგულ ევროპის ერთ საყოველთაო საბაჟო კედლებშუა მოქცევას. საქმის ასე დატრიალება უეჭველათ იმას გამოიწვევდა, რომ შიდ მომწყვდეულნი ერნი ეკონომი-



ურათ და აქედან პოლიტიკურათაც ძლიერ დაუახლოვდებოდნენ ერთმანეთს.

მეტია იმაზე ლაპარაკი, რომ ეგ. წოდ. საერთაშორისო ორგანოები და მათი ფუნქციები ჯერ კიდევ ასე ვთქვათ, ეფემერულ შინაარსისა და მნიშვნელობის არიან, მათ ჯერ კიდევ ვერ დაუმჩნევიათ ცხოვრებისათვის შესაფერი დაღი. მაგრამ მე რისი თქმა მინდოდა—ეს ისაა, რომ სხვა და სხვა ერთა და მათ წევრთა შორის გაბმულია განუწყვეტელი ქსელი, რომელიც თანდათან უფრო და უფრო იხლართება და რთულდება, რომ ეს კავშირი და ერთობა თანდათან უფრო და უფრო ვითარდება და მტკიცდება, რაიცა ბოლოს და ბოლოს იწვევს საყოველთაო მომწესრიგებელ ორგანოების აუცილებელ საჭიროებას. დღეს ამ ორგანოთა მხოლოდ და ნასახები არსებობს, მაგრამ არაფერი ელოდება წინ, რომ ისინი მომავალში საერთაშორისო ცხოვრების ნამდვილ მამოძრავებელ ფაქტორებად იქცენ.

არაფერი, გარდა გაბატონებულ კლასებისა! თვითეულ სახელმწიფოს თუ ერის სათავეში ჯერ კიდევ გაბატონებულნი კლასნი დგანან მესვეურებად. ამიტომ რაღა გასაკვირია თუ დღეს-დღეობით საერთაშორისო სამართალი და ბევრი სხვა ლამაზი მიეთ-მოეთობა აერთებს და აკავშირებს არა იმდენათ ერებს და მათ წევრებს, რამდენათ ყველა ერთა გაბატონებულ კლასებს ყველა ერთა დამონებულ კლასების წინააღმდეგ. ვინ არ იცის, რომ თანამედროვე გამანადგურებელი მილიტარიზმი მიმართულია არა იმდენათ გარეშე, რამდენათ შინაურ მტრის წინააღმდეგ, სწორეთ ამით აიხსნება, სხვათა შორის, ის უტყუარი და სრულიად ანალოგიური ფაქტიც, რომ ყველგან და ყოველ ერში მშრომელი მასსა თავგანწირულათ იბრძვის სახელმწიფო მართვა-გამგეობის სრულ

დემოკრატიზაციისათვის. მხოლოდ და მარტო ამგვარი ფიქრობს ის სამუდამოთ ბოლო მოუღოს გაბატონებულ კლასთა ეგ. წოდ. დიპლომატიის დამღუპველ პარპაშს. იგი ხმას იმაღლებს ქუჩაზედ თუ პარლამენტის ტრიბუნიდან საერთაშორისო **ცარცვა გლეჯის** წინააღმდეგ.

არსებობს, მაშასადამე, კლასთა არა მარტო ეროვნული (ერის ფარგალში), არამედ **საერთაშორისო სოლიდარობაც.** სახელმწიფო მრავლისაგან მრავალ საშვალელებს იძლევა, როგორც დაეინახეთ, ამ სოლიდარობის განსამტკიცებლათ. ამას ხელს უწყობს ის დიდი და მჭიდრო კავშირი, რომელიც არსებობს სხვა და სხვა ერთა წევრებ შორის როგორც წარმოებაში, ისე ვაჭრობაში. აქ საკმარისია გავიხსენოთ ეგ. წოდ. კარტელები და ტრესტები, რომელნიც თანდათან არა სჯერდებიან საკუთარ ერის ფარგლებში მოქმედებას, ისინი ერთბაშით და **მრავალ ერში** ლამობენ ბურთისა და მოედნის დანარჩუნებას. მათ გაუხდიათ ამა თუ იმ საქონლის დამზადება თავიანთ **მონოპოლიად**, ამიტომ ისინი ხშირათ განუკითხავათ ბატონობენ მსოფლიო ბაზარზედ; ისინი დაუზოგველათ ქყლეტენ ხოლმე უფრო სუსტ მეტოქეთ, ამ შემთხვევაში, არ დაგიძებენ, რასაკვირველია, არც მოდგმას და არც ეროვნებას; იგივე ორგანიზაციები სისტემატურათ ერევიან შრომისა და კაპიტალის უთანხმოებაში და ზურგს უმაგრებენ **კაპიტალისტ-წევრთ** განუჩევლათ ეროვნებისა და ქვეშემრდომობისა...

ასეთი მებრძოლი ორგანიზაციები დამონებულ კლასებს უფრო ეჭივრებათ, ვინაიდან გაბატონებულ კლასებს ისედაც დიდ ქომაგობას უწყევს ყველაზე მძლავრი ორგანიზაცია — სახელმწიფო. მშრომელთა მასსას გადააქვს თავისი კლასობრივი ბრძოლა აგრეთვე საერთაშორისო ნიადაგზედ. იგი ამ მიზნით პერიოდულათ მართავს საერ-



თაშორისო კონგრეს — კოფერენციებს, რომელნიც შევებენ სავალდებულო დირექტივებს ყველა ეროვნულ ორგანიზაციათათვის, იგი აარსებს აგრეთვე მუდმივ საერთაშორისო ორგანოებს: ბიუროთ, სეკრეტარიატებს და სხ. ამ გვარათ, მუშათა სამივე ჯგუფის ორგანიზაცია: პარტია, პროფესიონალი და კოოპერაცია, რაც დრო გადის, უფრო და უფრო უახლოვდება ერთმანეთს განურჩევლათ ეროვნებისა. მეტია მითითება იმ ათასგვარ მოვლენებზე, რომელნიც თითქმის ყოველ დღე ადასტურებენ ამ ორგანიზაციათა საერთაშორისო სოლიდარობას როგორც ნივთიერ-მოღარულათ, ისე პოლიტიკურათ. ფრიად დამახასიათებელია ამ უკანასკნელათ, შეგნებულ მუშათა ინტენსიური მისწრაფება, რათა თვითველ ერის სამსავე კლასობრივ ორგანიზაციას კარგი ფართეთ გავლოს გარეშე ერის თუ სახელმწიფოს მუშათა მისაღებათ და შესახისსლხორცებლათ...-

*
*
*

რა დასკვნის გამოყვანა შეიძლება ყველა ზემოთქმულიდან? ერთფეროვნება სოციალურ მოვლენათა და ანალოგიური სრბოლა სხვა და სხვა ერში ერთი უმესანიშნავესი და უცხადესი ფაქტია თანამედროვე ცხოვრებისა რა თქმა უნდა, ამის ძირითადი მიზეზი წინეთაც და ახლაც ერთისა და იმავე სოციალ-ეკონომიურ რეჟიმის გაბატონება იყო და არის სხვა და სხვა ხალხსა და ერში. ასე იყო ფეოდალურ ხანაში, მაგრამ კაპიტალისტური ხანა ერთობ დამახასიათებელია ამ მხრივ, წინეთ „ეკონომიკა-ზედნაშენის“ ერთფეროვნება არ იწვევდა სხვა და სხვა ხალხის წევრთა-შორის რაიმე სოციალობას, დინასტიათა და მალალ წოდების ნათესავური თუ პირადი განწყობილება კიდევ ვერ ჰქმნიდა ამ სოციალობას. ახლა კი ეს უკანასკნელი ყველისათვის თვალსაჩინო ფაქტია.

არაა იგი თვალსაჩინო ბ. Bätton-ისათვის. მას არა-

ფერი სწამს სოციალურ კათეგორიების ერთფეროვნებისა და იგი აზროვნებს ფილოსოფიურ-აბსოლიუტურათ და არ იცის რა ხილია მეცნიერულ-რელატივისტური პრინციპი. ადამიანი, რომელიც უარყოფს „სოციალურ ორგანოთა“ და მათი ფუნქციების ერთფეროვნებას სხვა და სხვა ერში, რა საკვირველია, არას გზით არ დაუშვებს სოციალობის უბრალო წასახსრაც ამ სხვა და სხვა ერის წევრთა შორის. იგი არსებობს, როგორც დავინახეთ.

ყოველ შემთხვევაში, ასეთი სოციალობა არ ვრცელდება მთელს კაცობრიობაზე. მილიარდ-ნახევარ ადამიანისაგან შემდგარი კაცობრიობა, რომლის შესახებ ასე მოუსვენრათ ქაქანებს ავტორი, მართლაც არ შეიცავს ერთნაირ მასალას, იგი გულისხმობს სულ მაღალ და სულ დაბალ კულტურის წარმომადგენელთ და ამიტომ სოციალობა ყველა მათ შორის დასაშვები არ არის. მაგრამ ეს გარემოება კიდევ არ გვაძლევს ნებას აქვე წერტილი დასვათ და კვიეტოზმს მივუცეთ. ავტორი სწორეთ ასე იქცევა. ის უპირისპირებს ერსა და კაცობრიობას ერთმანეთს და ერთ ბეწო ანგარიშს არ უწევს რა ხდება მათ შუა. სიმძიმის მთელი ცენტრი სწორეთ აქაა და არა სხვაგან. ერი წარმოსდგა ადამიანთა სოციალობიდან, მაგრამ რა უშლის ამავე სოციალობას ერზე უფრო დიდ ერთფულზე გავრცელდეს? ავტორი ვერ ატყობს, შესაძლოა—არ უნდა მას შეატყოს, რომ კითხვის ასე დაყენება დიდ ხიფათში აგდებს მთელს მის დასკვნებს. სოციალობა არ ვრცელდება კაცობრიობაზე, კეთილი და პატიოსანი, მაგრამ თუ მას ვერ იტყვს ერის ფარგლებიც? თუ, მაგ., ევროპის სხვა და სხვა ერმა ერთ მშვენიერ დღეს ერთსა და იმავე სოციალობის მორევში ამოყო თავი, მაშინ როგორ? მაშინ ხომ მივიღებთ ეროვნულ ორგანიზმის გარდა კიდევ უფრო დიდ და უფრო ფართე სოციალურ ორ-



განიზმს? საქმის ასე დატრიალება დედა-ბუდინანათ-ყვეს ავტორის უძირათადეს დებულებას თითქო **ერის გადაღმა შეუძლებელია რაიმე სოციალობა**: ეს კი თავის მხრით ბოლოს უღებს მის „უმშვენეირეს“ დასკვნას — **ერი ყველაფერია, კაცობრიობა არაფერი**.

ისიც სრული ჭეშმარიტებაა, რომ ერის გადაღმა ჩვენ არ გვეგულება დღეს-დღეობით მაინც მასზე უფრო დიდი და ფართე სოციალური **ორგანიზმი**. ცხოვრების განვითარებას ჯერ კიდევ არ მიუღწევია ამ წერტილამდე, მაგრამ ეს კიდევ არაა დიდი დაბრკოლება. ჩვენ დავინახეთ, რომ ევროპიელთა ანუ თეთრ-კანიანთა ეგ. წოდ. ცივილიზაცია უკვე ჰქმნის დღე-დღეზე, წლითი წლობით სოციალობის ისეთ ელემენტებს და ამ ელემენტთა ისეთ ურთიერთობათ, რომ უბრალო მომაკვდავიც ადვილათ განსკვრეტს ხსენებულ, ერზე უდიდეს ორგანიზმის შესაძლებლობას მომავალში, არა თუ შესაძლებლობას — აუცილებლობასაც კი.

მე ბევრი ვილაპარაკე და მეტია განმეორება, რომ ევროპიელთა თანამედროვე ცხოვრებამ იცის ადამიანთა და კლასთა იმგვარი სოციალური დამოკიდებულებანიც, რომელნიც თავზე გადადიან ამა თუ იმ ერის ბუნებრივ გავლენას და ჰქმნიან, ასე ვთქვათ, **არა-შიგ ეროვნულ** (nicht innernational) სოციალობას. და ეს სოციალობა, რაც დღე გადის, უფრო და უფრო რთულდება, უფრო და უფრო მაღალ საფეხურს აღწევს. კაპიტალიზმი, ეს მძლეთა-მძლე საზოგადოებრივი ურთიერთობა, თავს უყრის ყველა ჯურის ევროპიელთ, განურჩევლათ ეროვნებისა და ქვეშეწოდომობისა, და ჟღენთავს მათ საერთო ინტერესითა და მისწრაფებით.

კაცობრიობა ორგანიზმი არ არის, ეს არ არის არც ევროპიელობა ანუ სუმა ევროპის მცხოვრებთა, მაგრამ

ჩანასახნი თვით **ორგანიულ** სოციალობისა დიდი ხანია მათ შორის და დღეს უკვე მძლავრ საზოგადოებრივ ფაქტორებად ქცეულან ისინი. მაშასადამე, აქ არის ლაპარაკი **ტენდენციად ანუ მიდრეკილებაზე** და არა დასრულებულ პროცესზე.

რაც სიტყვით ასე ჩქარა გამოითქმის, იგი სინამდვილეში ნაყოფია მრავალ წელთა და საუკუნეთა საზოგადოებრივ ევოლიუციისა. მე დავსახე კაპიტალიზმი ყოველგვარ კარ-ჩაკეტილობის უღმობელ მტრად, მაგრამ ეს კიდევ არ მოასწავებს, ვითომ ჩვენ უთუოთ კაპიტალისტურ ხანაში უნდა მივალწიოთ კაცობრიობის, თუნდ ევროპიელთა ერთ სოციალურ ორგანიზმად ქცევას. კაპიტალიზმი იმდენ წინააღმდეგობას შეიცავს თავის არსებაში, რომ მისთვის შეუძლებელიც კია ასეთ დიად მისიის „კეთილათ დაგვირგვინება“. ამას ბევრი მტკიცება არა სჭირია, არც ადგილია აქ ამისათვის. გაიხსენეთ თუ გინდ თანამედროვე მილიტარიზმი, რომელსაც ასე თავგამოდებით იცავენ გაბატონებულნი კლასნი და მიზეზად კი მარტოოდენ **ერის ანუ ნაციის კეთილდღეობას** ასახელებენ, — აქედან ისინი **შეგნებულათ** გაურბიან ერთა სოლიდარობა-დაახლოვებას, რომელიც **მეტ ბარგად** გახდიდა მილიტარიზმს, ამ უებარ იარაღს „**შინაურ მტრების**“ წინააღმდეგ! გაბატონებულთა ტრაგიზმიც სწორეთ იმაში მდგომარეობს, რომ საზოგადოების გარდუვალი ევოლიუცია ეწინააღმდეგება მათს კლასობრივ ინტერესებს, პირველი მიგვაქანებს საკაცობრიო ორგანიზაციისაკენ, მეორე კი დეორგანიზაციისაკენ...

სოციალიზმი, კლასობრივ წინააღმდეგობათა მომსახურებელი წესწყობილება, ეს ხორცშესხმული ჰარმონია ცხოვრების მიდრეკილებისა, ერთის მხრით, და აღამიანთა სოციალ-ეკონომიურ ინტერესისა, მეორეს მხრით, დაახ-



რულებს იმ პროცესს, რომელსაც საძირკველი კიდევ უკმა
პიტალისტურმა ხანამ ჩაუყარა. კაპიტალიზმმა დაგვანახვა
ერის ორგანიზმობა, სოციალიზმი დაგვანახვებს აგრეთვე
ევროპიელობის და შემდეგ თვით კაცობრიობის ორგა-
ნიზმობას.

ბ. Baton ანგარიშს არ უწევს თანამედროვე ცხოვ-
რების ამ ცხადზე უცხადეს ტენდენციას, უამისოთ კი
კაცობრიობის სოციალოგიურათ განხილვა დიდი აბსუ-
რდია. მან მოიწადინ ერისა და კაცობრიობის სწორეთ
„სოციოლოგიური მხრით“ აწონ-დაწონვა, ხოლო უარ-
ყო თვით ცხოვრების ევოლიუციის კანონები. ასე წარ-
მოიდგინეთ, მან გვერდიც კი აუხვია მის პირდაპირ და-
ნიშნულებას და კაცობრიობა ბიოლოგიურ ცნებად გა-
მოაცხადა! მას აინტერესებს სოციალურ მოვლენათა
სტატისტიკა—ერის არსებობა—, ხოლო რაც შეეხება იმავ
მოვლენათა დინამიკას—ცვალებადობა—, ის არ აკვირდება
და არც უნდა დააკვირდეს მას. აქედან ის კონსერვატი
ული მოაზრება *par excellence*. ნუ გაგიკვირდებათ: ანა-
რქისტნი, მართალია, „შეიარაღებულ აჯანყებას“ ექო-
მაგებიან, მაგრამ აზროვნებაში ერთობ სტატისტიკები (თუ
სტატისტიკები?) არიან! ამის მიზეზი, უნდა ვიფი-
ქროთ, ხშირათ ისიცაა რომ საფუძვლიან კვლევა-
ძიება მათ ცუდ გუნებაზე აყენებს. საილუსტრა-
ციოთ აიყვანეთ იგივე Baton, რომელიც ვერა და
ვერ ურიგდება კაცობრიობის მთლიანობა-ერთობას,
„შეუძლებლობის გარდა-ბრძანებს ის—ასეთი ერთობა
არც სასურველია. იგი სიკვდილია ინდივიდუალობისა,
ორიგინალობისა. იგი მოსაწყენია და მკვლელი შემოქმე-
დებისა.“ (372, ხაზ. ჩ.). როგორც ხედავთ, ავტორი
შიშობს, ვაი თუ ასეთ საკაცობრიო ერთობაში გახართობი
არაფერი დამრჩესო! სოციალურ-მოვლენათა დანიშნულ-

ბაც თურმე ის არის, რომ გაართოს და არ მოაწყინოს ჩვენი ავტორი!

მზგავს სუბიექტივისტისაგან არცაა გასაკვირი თუ გინდ ასეთი ფრაზაც: „კოსმოპოლიტიზმი შეუძლებელი უაზრობაა.“ (371). მაშ უაზრონი ყოფილან ყველა ისინი, ვინც იგი წამოაყენა მახლობელ წარსულში?! იგივე ავტორი აი, რას გვეუბნება მეორე ალაგას: „საკვირვებელია, ზოგიერთ ხალხს, მაგალითად ფრანგებს, ერთი და იგივე სიტყვა „Humanité“ აქვსთ ორი ცნების გამოსახატავად — **„კაცობრიობისა და ადამიანობისა“**, (375, ხაზ. ავტ.). ცხადია, ავტორი ვერ ამჩნევს მკიდრო კავშირს, არსებულს კოსმოპოლიტიზმსა და humanité-ს შორის, — უამისოთ იგი არ მონათლავდა პირველს უაზრობად.

კოსმოპოლიტიზმი, როგორც საზოგადოებრივი მიმდინარეობა, საფრანგეთის დიდ რევოლიუციის პირმშო შვილია. მე-XVIII-ე საუკუნის მეორე ნახევარში, როცა აბსოლიუტიზმს ჯერ კიდევ გული საგულესა ჰქონდა, საფრანგეთის ენციკლოპედისტნი და საზოგადოთ განმანათლებელნი თავდავიწყებით ქადაგებდნენ **ადამიანის უზნეობას** განურჩევლათ შთამომავლობისა და სოციალურ მდგომარეობისა. შემდეგ, დიდ რევოლიუციის იმ საბედისწერო მომენტში, როცა ევროპის გვირგვინოსნებმა ლუი მე-XVI-ესთან ერთათ საფრანგეთის ასაოხრებლათ შევბნელი კოალიცია შეადგინეს, „მაშინვე დაიბადა აზრი — ამბობს ცნობილი ისტორიკოს **ოლარი** შესახებ **ხალხთა ფედერაციისა** მეფეთა წინააღმდეგ, შესახებ **ევროპის მუნციპალიზაციისა**“ ამ დროს ეკუთვნის 18 უცხოელ შესანიშნავ პირთა რევოლიუციონურ კონვენტის მიერ საფრანგეთის სრულ-უფლებიან მოქალაქეებად აღიარება: ინგლისელ ბუნებისმეტყველ პრისტლეისა, ამერიკელ პატრიოტ ვაშინგტონისა, შვეიცარელ პედაგოგ პესტა-

ლოცისა, გერმანელ ჰოეტ შილერისა და სხვებისა. ამ გვართ — განაგრძობს იგივე ოლარი — მარიამობისთვისა და ენკენისთვის 1792 წ. ბევრისათვის სათაყვანებელ იდეალად იქცა დემოკრატიული, გაერთიანებული და პროპაგანდისტული რესპუბლიკა, რომელიც ლამობდა უნივერსალურად ქცევას.⁴

ამ „უნივერსალურ რესპუბლიკის“ წევრნი, საფრანგეთის საუკეთესო შვილთა აზრით, **ნამდვილ ადამიანებად, თავისუფალ მოქალაქეებად** უნდა ქცეულიყვნენ. მაშასადამე, **კოს მოპოლიტიზმი იგივე იყო წინეთ რაც ადამიანობა, კაცობრიობაში განსახული, გაიხსენეთ** სიტყვა „humanite-ს ორ-აზროვნება დღესაც კი კოსმოპოლიტიზმი და ჰუმანიზმი ძალზე უახლოვდებიან ერთმანეთს ჩვენს წარმოდგენაში. ეს კოსმოპოლიტიზმი ან კიდევ ჰუმანიზმი აღიარებდა ორ ცნებას **ადამიანს და კაცობრიობას**, მათ შუა რომ ერთი ცოცხალი სოციალური **ორგანიზმი** — **ერი** არსებობდა, ეს უყურადღებოთ რჩებოდა. მაგრამ ძალიან ცოტა ხანს გასტანა ასეთმა მდგომარეობამ, — იმავე საფრანგეთის დიდმა რევოლიუციამ წამოაყენა **ერი, როგორც ძვირფასი ხელუხლებელი პრინციპი**, მან გარდაჰქმნა ფრანგნი „დიდ ნაციად“... როცა იტალიაში გამარჯვების შემდეგ ჯერ ისევ დენერალი ბონაპარტე მოვიდა პარიზს, მან ასე მიმართა ყოფილ ხუცესსა და მაშინ კიჭდირექტორიის წევრს სიეისს: „მე შევქმენი **დიდი ნაცია** რაზედაც მოხუცმა მორიდებულათ მიუგო უზურპატორს: „ეს იმიტომ, რომ ჩვენ კიდევ უფრო ადრე შევქმენით **ნაცია** — ისე უეპიტეტოთ

აქედან კოსმოპოლიტიზმის ალაგი დაიქირა **ინტერნაციონალიზმმა**, რომელიც გულისამობს სამსავე ცნებას: **ადამიანს, ერს და კაცობრიობას** ცხადია, ინტერნაციონა-

ლიზმი კოსმოპოლიტიზმის განვითარებაა და არა მისი უარყოფა. ქეშმარიტი ინტერნაციონალისტი სწორეთ ისაა, ვისაც ასულდგმულებს პირველ კოსმოპოლიტთა ანუ ჰუმანი-სტთა მაღალი იდეალები. ყველას ახსოვს რევოლიუციონურ საფრანგეთის აღმაფართოვანებელი საკაცობრიო ლოზუნგი: *liberté, égalité draternité!* (თავისუფლება, თანასწორობა, ძმო-ბა!)-ვინ წამოისროლა ეს სატყუები? **დიდ-მანაციამ** ნუთუ ახლაც არაა ნათელი სრული ჰარმონია ერსა და კაცობრიობის შორის? ღირსეული მამულიშვილი იმასა ჰქვი.ნ ჩვენს დროში, ვინც იმავე დროს არა ნაკლებ ღირსეული **მსოფლიო მოქალაქეა** ერის სიდიადე შეუძლებელია, თუ მისი წევრნი გაუღენთილი არ არიან როგორც ეროვნულ ისე საკაცობრიო იდეალებით. მეცნიერებაც სწორეთ ამ იდეალების ერთგული დარაჯია.

ბ. Bâton სხვაგვარ მსჯელობს, ის შემდეგი სიტყვებით ათავენს თავის შრომას: „და **ადამიანობის** იდეალი რომ დაიკერდეს ადგილს **კაცობრიობის** იდეალისას ადამიანის შეგნებაში, — ვგონებთ მისთვის ეს უფრო ქეშმარიტი, კეთილშობილი და დიადი იდეალი იქნებოდა.“ (ხაზ.ავტ.). ასე და ამ გვარათ. ავტორი შეურიგებელი მტერია ცნება კაცობრიობისა, მას უნდა ამოშალოს იგი „ადამიანის შეგნებიდან“! ხოლო ნურვინ იტყვის, რომ თვითონ ის „შეგნებული“ მოაზრება. ადამიანობა ისეთი რამ განყენებული ცნებაა, რომელიც გასცილებია ერის ქერქს და მხოლოდ კაცობრიობაში ჰოულობს სრულს განსახვას. და ეს იმიტომ, რომ ცხოვრების ევოლიუცია ყველგან და ყოველ ხალხში ერთსა და იმავე კანონებს ექვემდებარება, რომ ლოდიკა **ერთია** აქედან ადამიანი ყველგან და ყოველ ხალხში ერთგვარათ ითვისებს ამ კანონებს და ერთგვარათვე გამოხატავს მათ ამა თუ იმ ენაზე.



ახლა კი დროა დავაყენო თვით ის კითხვა, **მელიც მხოლოდ და ირონიულად დავაწერე ამ წიგნაკს სათაურად: ერი თუ კაცობრიობა.** Biton არ ხუმრობს, როგორც დავინახეთ, და სერიოზულად უპარისპირებს ამ ორ ცნებას ერთმანეთს, ისინი მას გამოჰყავს ერთი მეორის ანტიპოდად, მის წარმოდგენაში ერის არსებობა სახიფათოა კაცობრიობის და წინაუკმოდ — კაცობრიობის არსებობა ერის არსებობისათვის მზგავსი მსჯელობა მოკლებულია როგორც აზრს, ისე გონიერებას. ერი და კაცობრიობა სულაც არ არიან ერთი მეორის უარმყოფელნი ცნებანი. ერთიცა და მეორეც ძალიან კარგათაა შეიძლება არსებობდეს **ერთსა და იმავე დროს**, როგორც მთლიანი რამე, როგორც ორგანიზმი. ეს არ ეწინააღმდეგება არც რეალურ ცხოვრებას და არც მით უმეტეს ადამიანის ლოლიკას.

ჩვენს დროში ბევრს აინტერესებს კითხვა — გაითქვიფებიან თუ არა ოდესმე ერნი კაცობრიობის დიდ ოკეანეში, ან სხვა სიტყვით — მოისპობიან თუ არა ოდესმე ერნი, როგორც ასეთნი? ბ. Biton-ს ერთობ მწვეფვეთ ჩასწვეთებია ეს კითხვა გულის სიღრმეში, კაცობრიობა მას მოსჩვენებია რაღაც საშინელ ტარტაროზად, რომელიც ნათქავეს ყველაფერს და მათ შორის ერსაც, ამიტომაც ასე ცხარეთ ეკვეთება იგი მას. დავამშვიდებ ავტორს, — ეს კითხვა **აკადემიურის ხასიეთისაა** და მისი თვით ცხოვრების მიერ გადაქრა შორეულ მომავალს ეკუთვნის. დღესდღეობით ჩვენ საქმე გვაქვს, ერთის მხრით, სოციალურ ორგანიზმებთან — **ერებთან** და მეორეს მხრით ისეთ **არა-შიგეროვნულ სოციალურ** მოვლენებთან, რომელთა რომელთა დაუცხრომელის რბოლა **მიდრეკილია** აგრეთვე ერზე უდიდეს და უფართოვეს სოციალურ ორგანიზმის

ჩამოყალიბებისაკენ. კაპიტალიზმის და შემდეგ სოციალიზმის გამაერთიანებელი ტენდენცია, რა თქმა უნდა, მარტო ერზე არ შეჩერდება—ვისაც ერის ჩამოყალიბების პროცესი ნათლათა აქვს წარმოდგენილი მას არ გაუჭირდება განსკვრიტოს ადამიანის მოდგმის გაერთიანება მთელს მსოფლიოზე, და ეს იმიტომ რომ ორსავე შემთვევაში ერთი და იგივე „რკინის კანონები“ მოქმედებს—, მაგრამ საზოგადოებრივმა ცხოვრებამ იცის აგრეთვე მეორე, სახელდობრ განმაცალკევებელი ტენდენციაც. მრავალფეროვნება ისეთივე კანონიერი მოვლენაა, როგორც ერთფეროვნება; მათ არა აქვთ, როგორც ერთ ალაგას ვთქვით, არც დასაბამი და არც დასასრული. ადამიანთა ცხოვრებაში გაბატონებულია ორნაირი მიდრეკილება, ერთი არის ნიველიზაცია (გათქვეფა) და მეორე ინდივიდუალიზაცია (განცალკევება); პირველს იწვევს მოვლენათა ერთფეროვნება და მეორეს—მოვლენათა მრავალფეროვნება. ერთა შორის შრომის განაწილება, მაგ., აშკარათ მოწმობს ამ ორ მიდრეკილების არსებობას: ერთი ვერ ძღლებენ უერთმანეთათ, ამ მხრივ მათი წევრნი თითქო ერთ საკაცობრიო ორგანიზმში შედიან; იმავე დროს თვითეული ერი თავის თავათაც ცალკე ინდივიდუალობას წარმოადგენს, რაიცა გამოწვეულია ბუნების და სოციალ-ეკონომიურ ვითარების სხვა და სხვაობისაგან.

მაშასადამე, ადამიანი და ერი არსებობენ მატერიალურათ, ხოლო კაცობრიობა იდეოლოგიურათ, მაგრამ ეს იდეოლოგია, რა თქმა უნდა, მეტაფიზიკურ მიეთმოეთობის ნაყოფი არ არის, იგი გამომდინარეობს თვით სოციალურ ცხოვრების ძლევამოსილ მსვლელობიდან. მეცნიერება მარტო არსებულის აღიარება როდია, ის

ითვალისწინებს აგრეთვე მოვლენათა აუცილებელ ურთიერთობას მომავალში. აქედან სამივე პრინციპი — ადამიანი, ერი, კაცობრიობა — ერთნაირათ ძვირფასი და მისასწრაფავი უნდა იყოს ყველა იმათთვის ვინც კი წინ იხედება.



მ კ ი თ ხ ვ ე ლ ს.

ეს წიგნაკი დაუმთავრებლათ გამოდის. მასში მოთავსებულია მხოლოდ პირველი ნახევარი ხელთნაწერისა, მეორე ნახევარმა კი ავტორისა და გამომცემლობისაგან „დამოუკიდებელ მიზნების გამო“ სტამბამდის ვერ მიაღწია. კომენტარიები შეტია...

ავტორი იმედს არ ჰკარგავს, რომ მას კიდევ მიეცემა საშუალება დანაკლისის შესაყვებათ.

ა. ჩ - ლი.



